

大方等大集經



大方等大集經卷第十二

北涼天竺三藏曇無讖譯

虛空藏菩薩所問品第六之一

如是我聞一時婆伽婆遊如來行處妙寶莊嚴堂上  
如來威神大功德莊嚴衆相具足因於本行佛地得  
報菩薩宮宅稱無量讚如來神力之所建立入無礙  
智行處生勝喜悅思念進智分別巧說衆德具足來  
世所歎世尊正覺善轉法輪善能調順無量衆生於  
諸法中皆得自在知諸衆生心所趣向善能分別一  
切諸根彼岸善斷結習永盡無餘所施佛事自然成  
辦與大比丘衆六百萬人俱其心調柔結習已斷皆  
是如來法王之子行甚深法善能解了無所有法殊  
妙端正威儀具足是大福田止住如來所教法中復  
與大菩薩僧俱度一切諸行不捨菩薩所行得無生  
忍於諸衆生不捨大悲過諸世間而順世法勤化衆  
生亦能善入如來行地又復不離菩薩行地其名曰  
普明菩薩摩訶薩無礙眼菩薩於一切法自在王菩  
薩無礙行處菩薩分別辯覺菩薩淨無量網明燈王  
菩薩不染行處菩薩壞魔界放光明菩薩如是等不  
可計阿僧祇不可思不可稱不可量無齊限不可說



菩薩摩訶薩俱爾時世尊說諸菩薩出要之行名無礙法門莊嚴菩薩道成就佛法諸力無畏得知諸法自在入陀羅尼印門入分別諸辯門入大神通門入說不退轉輪諸乘平等門入一相法界無分別門入說隨衆生根所解差別門入堅法分別壞諸魔界善順思惟門入斷諸結及見無礙智慧門入無等願方便智門入諸佛等智門入諸法無滯礙如實分別門入無變異平等法門入甚深十二因緣門入功德智慧莊嚴佛身口意堅固思進念慧無盡門入四聖諦門爲調伏聲聞故入遠離身心行門爲調伏辟支佛

故入授一切智記門爲調伏菩薩故入諸法自在門爲顯佛功德故所謂開示解說顯現令解教讀施設次序開張分別令易隨順正說爾時世尊如是善分別入法方便時於此三千大千世界一切諸色像若鐵圍山大鐵圍山須彌山王及諸黑山四天下及閻浮提聚落城邑舍宅大海江河泉源陂池藥草樹木及諸叢林諸龍夜叉乾闥婆阿修羅迦樓羅緊那羅摩睺羅伽等宮殿地神宮殿虛空中諸神宮殿四天王天三十三天夜摩天兜率陀天化樂天他化自在天及梵天宮殿上至阿迦膩吒天宮殿一切大地及

欲界色身衆生悉皆隱蔽眼所不見喻如劫盡火災起後大地燹盡大水未出當爾之時乃無一色與眼作對爾時三千大千世界亦復如是亦無少色是欲色界所攝唯除妙寶莊嚴堂中所見色像爾時於妙寶莊嚴堂上虛空中無所依著自然而有無量百千那由他寶臺微妙莊嚴世所樂見喻如大妙莊嚴世界一寶莊嚴佛土菩薩所住寶臺此諸寶臺亦復如是見諸大衆坐寶臺中於妙寶莊嚴堂內自然踊出淨妙真金師子之座高十千由旬此師子座出妙淨光明普照此三千大千世界映諸菩薩光明令不明顯爾時大衆歡喜踊躍心情悅豫歎未曾有合掌向佛作如是言今者如來必說大法現此瑞應爾時舍利弗承佛威神從寶臺起更整衣服偏袒右肩右膝著地合掌向佛而白佛言世尊是何瑞相有如是等生勝喜悅現大神變世尊此諸大衆皆生疑惑願如來說何因何緣現此未曾有事爾時佛告舍利弗東方去此過八佛世界微塵數等佛土有世界名大莊嚴彼國有佛號一寶莊嚴如來應供正遍知明行足善逝世間解無上士調御丈夫天人師佛世尊今現在說法以何因緣世界名大莊嚴若廣說彼世界莊

嚴事者一劫不盡是故彼土名大莊嚴何因緣故彼  
佛名爲一寶莊嚴舍利弗彼如來因一寶說法所謂  
無上大乘之寶是故彼佛名一寶莊嚴彼佛典諸菩  
薩衆各昇師子座涌在空中高八十億多羅樹爲諸  
菩薩說虛空印法門何謂虛空印法門如一切法以  
虛空爲門無住處故一切法無住處門無形相故一  
切法無形相門過諸行處故一切法無行處門內外  
淨故一切法淨門性無染故一切法無染門自性寂  
靜故一切法寂靜門心意識本無故一切法本無門  
離物非物故一切法無物門無教相故一切法無教  
門無形段故一切法無形段門離因緣境界故一切  
法無因緣境界門寂滅相故一切法寂滅門離二相  
故一切法無二門捨別異故一切法無別異門入一  
相故一切法一相門自相淨故一切法自相淨門過  
三世故一切法過三世門不離平等故一切法不離  
平等門幻化相非相故一切法幻化相門體不實故  
一切法無體門無作相故一切法無作門身心遠離  
故一切法遠離門離相無相故一切法無相門相不  
動故一切法不動相門無依處故一切法無依處門  
住無際故一切法無際門無巢窟故一切法無巢窟

門無我無我所故一切法無我無我所門無主故一  
切法無主門性無我故一切法無我門內清淨故舍  
利弗彼一寶莊嚴如來爲諸菩薩廣說如是虛空印  
法門彼如來說是法時無量阿僧祇諸菩薩解知諸  
法性與虛空等於諸法中得無生忍舍利弗彼大莊  
嚴刹土一寶莊嚴佛所有一菩薩摩訶薩名虛空藏  
以大莊嚴而自莊嚴於諸不可思議願最爲殊勝得  
一切功德中之威德無礙知見不可思議菩薩功德  
以自莊嚴以諸相好莊嚴其身以善說法隨所應度  
莊嚴其口不退於定莊嚴其心以諸總持莊嚴其念  
入諸微細法莊嚴其意順觀法性莊嚴於進以堅固  
誓莊嚴淳至以必成辦莊嚴所作以從一地至一地  
莊嚴畢竟捨諸所有莊嚴於施以淨心善語莊嚴於  
戒於諸衆生心無有礙莊嚴忍辱衆事備足莊嚴精  
進入定遊戲神通莊嚴於禪善知煩惱習莊嚴般若  
爲救護衆生莊嚴於慈住不捨衆生莊嚴於悲心無  
猶豫莊嚴於喜離於憎愛莊嚴於捨遊戲諸定莊嚴  
神通得無盡寶手莊嚴功德分別諸衆生心行莊嚴  
於智教衆生善法莊嚴於覺得慧明淨莊嚴慧明得  
義法辭應莊嚴諸辯壞魔外道莊嚴諸無畏得佛無

量功德而自莊嚴常以諸毛孔說法莊嚴於法見諸  
佛法明莊嚴自明能照諸佛國莊嚴光明說不錯謬  
莊嚴所說神通隨所樂說莊嚴教授神通到四神足  
彼岸莊嚴變化神通入佛密處莊嚴諸如來神通自  
悟正智莊嚴法自在如說而行無能壞者莊嚴一切  
善法堅固彼虛空藏菩薩成就如是等無量功德與  
十二億菩薩摩訶薩俱發意欲來詣此娑婆世界見  
我禮拜供養恭敬圍遶亦爲此大普集經分別少法  
門分故又爲此十方諸來會菩薩生大法明故又爲  
增益開大乘法故又爲受持如來法故又爲無量衆

生善根出生故又爲以善法調伏諸魔外道故又爲  
示現菩薩師子遊戲神通故彼虛空藏菩薩欲來至  
此是其瑞應爾時世尊說此事已卽時虛空藏菩薩  
與十二億菩薩摩訶薩恭敬圍遶詣一寶莊嚴佛所  
白佛言世尊我欲詣娑婆世界見釋迦牟尼佛禮拜  
供養彼佛報言欲往隨意宜知是時卽頂禮一寶莊  
嚴如來足下已右遶七匝承佛遊戲無作神足於彼  
大莊嚴國土忽然不現以一念頃與諸菩薩衆俱來  
至此娑婆世界寶莊嚴堂妙寶臺上爾時虛空藏菩  
薩雨妙華香供養世尊及此大普集經所謂曼陀羅

華摩訶曼陀羅華波梨質多羅華摩訶波梨質多羅  
華曼殊沙華摩訶曼殊沙華盧遮那華摩訶盧遮那  
華水陸諸華大如車輪百葉千葉百千萬葉皆出光  
明香氣普薰妙香適意開敷鮮淨雜色光耀眼所樂  
見雨如是等種種無量妙華滿妙寶堂中高一多羅  
樹作諸天樂其音皆出無量百千法門之聲與檀波  
羅密相應聲尸羅孱提毗梨耶禪那般若波羅密相  
應聲與四無量相應聲與四攝法相應聲與助道法  
相應聲與三脫門相應聲與四聖諦相應聲與十二  
因緣相應聲爾時虛空藏菩薩供養世尊頂禮佛足

遶七帀已在一面立白佛言世尊彼一寶莊嚴如來  
應供正遍知致問無量少病少惱起居輕利安樂行  
不彼一寶莊嚴如來又言有十二億菩薩與虛空藏  
菩薩俱往至彼娑婆世界願世尊說如是如是法使  
諸菩薩得自然智亦使成就大法光明已還來至此  
所以者何以世尊昔來已曾化此善男子等發菩提  
心爾時虛空藏菩薩當世尊頂上化作大寶蓋廣十  
手由旬以青瑠璃爲軒真珊瑚寶爲子以瑠璃及闍  
浮檀金爲斗垂雜妙真珠縵網瓔珞寶鈴和鳴其蓋  
光明普照十方與諸妙華互相綺錯爾時虛空藏菩

薩於如來不思議功德深生敬重合掌向佛以偈讚

言

法義智慧最勝尊

本淨無垢無所著

喻如虛空無染汙

我禮不動聖足下

行無與等無涯底

現法嚴身最殊勝

佛真法身如虛空

普生大悲而濟度

人中師子能示現

百福莊嚴世尊身

斷諸言語無音響

離諸言說無戲論

雖知如是而現說

無性衆生令悅豫

諸心非心得此心

能知非心幻化性

大方廣心集卷之二

八

讓二

善知衆生心行性

而能不住彼我心

示現威儀濟衆故

善逝身無作不作

佛知衆生隨所樂

卽能示現如是形

世尊於法不計我

不生憶想著於法

能知以何法受教

而隨所悟應時說

大衆渴仰瞻世尊

世所希有最無比

世尊無心於示現

然能令諸大衆悅

此等諸法從緣生

虛無寂寞非真實

世尊善知如是法

得至清涼泥洹道

去離二邊不著中

知虛非真無自性

此等諸法無作者

善說業報非斷常

法無衆生命及人

寂靜無名如虛空

如實分別無衆生

而安多衆至甘露

昔行多劫不思議

求進勢力勝菩提

所爲妙行今已成

至無至義覺無餘

一切諸法上中下

悉知平等常無異

智者所知知不著

是故世尊定不亂

陰入諸界如幻化

三界皆如水月中

衆生虛僞性如夢

以智分別說是法

世人假稱名得道

實無有得無得相

大方廣華嚴經卷二

七

讓一

如道無得輪無轉

如輪無轉無度者

故能度衆於四流

自度度彼繫顛倒

善能安慰苦惱者

自滅滅彼至無爲

衆生無生無涅槃

衆生本淨不可得

道及衆生猶如幻

自覺此際覺多衆

如虛空中不見色

一切羣生色亦爾

諸法離色及色相

能知此色則得離

以諸妙喻讚歎佛

孰見而讚是其毀

佛德如空無差別

無所限量是讚佛

故禮淨尊淨他者

無緣無心入微心

如佛功德世尊知

如佛功德我今禮

能知衆生無我者

知諸法際離欲者

見法身者則見佛

卽爲供養十方佛

虛空藏菩薩說此偈已卽時妙寶莊嚴堂及虛空中  
諸寶臺六種震動一切大衆心淨悅豫踊躍歡喜歎  
未曾有皆言虛空藏菩薩善能說此妙偈若有善男  
子善女人能行此法者乃至夢中不見有法以漸皆  
當得師子吼如虛空藏菩薩爾時虛空藏菩薩以如  
斯妙偈讚如來已白佛言世尊欲少所問唯願聽許  
若聽問者爾乃敢問所以者何世尊有無量知見能  
知衆生諸根有淳熟未淳熟者世尊明達去諸闇冥  
故世尊了義善說分別諸句義故世尊知時不過限  
故世尊所說不謬如說不錯故世尊知時隨諸衆生  
行說法故世尊善遊戲通達諸神足故世尊善觀體  
衆生心行故世尊最無染於諸法中得自在故世尊  
自悟覺了諸法故世尊正御邪趣衆生教令入正故  
世尊是大醫王能令無始世界衆生諸病永斷故世  
尊大力成就十力故世尊無畏成就四無畏故世尊  
無勝成就十八不共法故世尊大慈行救一切衆生  
心無礙故世尊大悲行知見無我拔一切衆生苦故

世尊大喜行禪定解脫三昧到彼岸故世尊大捨行  
斷一切憎愛心如虛空故世尊得平等覺了諸佛法  
無礙故世尊無憎愛心畢竟清淨毀譽不動故世尊  
無希望智慧滿足於利養讚歎無欲求故世尊一切  
知見一切佛行處到彼岸故我知見世尊有如是等  
無量無邊功德成就是故我欲於法門中少有所問  
虛空藏菩薩作是語已爾時世尊告虛空藏菩薩言  
善男子我當聽汝問隨汝欲問恣汝所問吾當隨汝  
所問悅可爾心爾時功德光明王菩薩問虛空藏菩  
薩言善男子汝爲誰故欲問如來卽時虛空藏菩薩  
以偈報功德光明王菩薩言

大方等六度集經卷之二

二

讚一

一切等心諸衆生

平等能至彼岸者

遊戲無垢悲心中

我爲是等問世尊

能到正見無垢穢

已無猶豫斷彼疑

自得了達利衆生

我爲是等問世尊

知我無我無與等

爲衆發心不著衆

能脫衆生計我見

我爲是等問世尊

能護威儀順所行

其心清淨如虛空

堅固不動如須彌

我爲是等問世尊

進心無涯慧無等

勇健能害煩惱怨

已結已斷斷彼結

我爲是等問世尊

樂施威儀調伏心

常住聞進戒忍力

禪定諸通勝慧明

我爲是等問世尊

樂空無相無願法

而現受形處生死

無生無終達甘露

我爲是等問世尊

知見甚深無涯際

聲聞緣覺所不及

而知一切衆生行

我爲是等問世尊

善能了達樂正行

於法非法繫已斷

常處正定心不亂

我爲是等問世尊

不斷佛種諸賢士

能護正法及與僧

名聞三世諸佛讚

我爲是等問世尊

爾時虛空藏菩薩以此妙偈答功德光明王菩薩已  
白佛言世尊云何菩薩行檀波羅密與虛空等云何  
行尸波羅密羸提波羅密毗梨耶波羅密禪波羅密  
般若波羅密與虛空等云何行功德與虛空等云何  
行智與虛空等云何菩薩不離如如來所許念佛  
念法念僧念施念戒念天云何菩薩修行諸法平等  
如泥洹云何菩薩善分別行相云何菩薩持諸佛法  
寶藏隨如來所覺法相性如實知諸法相性已不取  
不捨云何菩薩分別衆生從始已來清淨而教化衆

生云何菩薩善順發行成就佛法云何菩薩不退諸  
通於諸佛法悉得自在云何菩薩入甚深法門諸聲  
聞辟支佛所不能入云何菩薩於十二因緣善得勝  
智方便離二邊諸見云何菩薩爲如來印所印如如  
不分別智方便云何菩薩入法界性門見一切法平  
等性云何菩薩淳至堅固猶如金剛於此大乘心住  
不動云何菩薩自淨其界如諸佛界云何菩薩得陀  
羅尼終不失念云何菩薩得無障礙如來加持辯云  
何菩薩得自在示現受生死云何菩薩破諸怨敵去  
離四魔云何菩薩利益衆生莊嚴功德云何菩薩世  
無佛時能作佛事云何菩薩得海印三昧善能得知  
衆生心行云何菩薩能得知諸塵界無礙云何菩薩  
威儀行成就離諸闇冥得勝光明於諸法中得自然  
智速得成就一切智行爾時世尊告虛空藏菩薩言  
善哉善哉善男子汝善能分別問於如來如斯妙義  
如汝已曾供養過去無量諸佛種種善根心行平等  
喻如虛空禮敬諸佛至慧明處發勤精進欲度一切  
諸佛妙法不捨一切衆生度大慈悲彼岸及過諸魔  
行不離世法以虛空同量之心成就此無上大乘法  
法虛空藏汝之功德無有邊際難可校量汝已曾於

過去恒河沙等諸佛世尊所問如此事自亦能說虛  
空藏諦聽諦聽善思念之吾當爲汝分別解說所問  
諸菩薩事復過於此能得無上大乘如來自然智一  
切種智虛空藏菩薩言唯然世尊願樂欲聞佛告虛  
空藏善男子菩薩成就四法行檀波羅密與虛空等  
何謂爲四善男子若菩薩於一切處無障礙不分別  
行檀波羅密以我淨故於施亦淨以施淨故於願亦  
淨以願淨故於菩提亦淨以菩提淨故於一切法亦  
淨善男子是爲菩薩成就四法行檀波羅密與虛空  
等善男子若菩薩成就八法能淨檀波羅密何等爲  
八離我能施離爲我施離愛結施離無明見施離彼  
我菩提相施離種種想施離希望報施離慳嫉施其  
心平等如虛空等施是爲菩薩成就八法能淨檀波  
羅密離此八法是謂淨施喻如虛空無所不至菩薩  
慈心行施亦復如是喻如虛空非色叵見菩薩所行  
諸施不依於色亦復如是喻如虛空不受苦樂菩薩  
所行諸施離一切受亦復如是喻如虛空無有想知  
菩薩所行諸施離諸想結亦復如是喻如虛空是無  
爲相菩薩所行諸施無爲無作亦復如是喻如虛空  
虛假無相菩薩所行諸施不依識想亦復如是喻如

虛空增益一切衆生菩薩所行諸施利益衆生亦復如是喻如虛空不可窮盡菩薩所行諸施於生死中無有窮盡亦復如是善男子喻如化人給施化人無有分別無所戲論不求果報菩薩亦復如是如化人相去離二邊而行諸施不分別戲論希望果報善男子菩薩以智慧捨一切結使以方便智不捨一切衆生是爲菩薩行檀波羅密與虛空等爾時會中有一菩薩名曰燈手從坐而起偏袒右肩右膝著地合掌白佛言世尊何等菩薩能行如是檀波羅密佛言善男子菩薩若過諸世間得出世間法非色無體無行

知見清淨非闇非明離一切諸相至無相智際成就無盡忍近如來知見已紹菩薩決定界分已得受記爲不退轉印所印已得灌頂正位已行善行知衆生行相至一切處亦無所至如是菩薩能行是檀波羅密說此法時萬八千菩薩見諸法性猶如虛空得無生法忍佛告虛空藏菩薩言善男子菩薩成就四法行尸羅波羅密與虛空等何謂爲四善男子菩薩知身如鏡中像知聲如響知心如幻知諸法性猶如虛空是爲菩薩成就四法行尸羅波羅密與虛空等善男子菩薩成就八法能護淨戒何等爲八善男子諸

菩薩不忘菩提心能護於戒不求聲聞辟支佛地能  
護於戒持戒不限於戒能護於戒不恃諸戒能護於  
戒不捨本願能護於戒不依一切生處能護於戒成  
就大願能護於戒善攝諸根爲滅煩惱能護於戒是  
爲菩薩成就八法能護淨戒善男子喻如虛空離諸  
希望菩薩以無求心能護於戒亦復如是喻如虛空  
清淨菩薩持戒清淨亦復如是喻如虛空無有垢汙  
菩薩持戒無垢亦復如是喻如虛空無有熱惱菩薩  
持戒無惱亦復如是喻如虛空無有高下菩薩持戒  
無高無下亦復如是喻如虛空無有巢窟菩薩持戒  
而無所依亦復如是喻如虛空無生無滅畢竟無變  
菩薩持戒無生無滅畢竟無變亦復如是喻如虛空  
悉能容受一切衆生菩薩持戒普能運載亦復如是  
爲利益衆生能護正戒善男子如水中月無持戒破  
戒菩薩亦復如是了知一切諸法猶如月影無持戒  
破戒是爲菩薩行尸波羅密與虛空等善男子菩薩  
成就四法行羸提波羅密與虛空等何等爲四善男  
子若菩薩他罵不報以分別無我想故他打不報以  
無彼想故他瞋不報以離有想故他怨不報以去離  
二見故是謂菩薩成就四法行羸提波羅密與虛空

等善男子菩薩成就八法能淨羸提波羅密何等爲  
八善男子菩薩善淨內純至修羸提波羅密善淨外  
不希望修羸提波羅密於上中下畢竟無障礙修羸  
提波羅密隨順法性無所染著修羸提波羅密離一  
切諸見應空修羸提波羅密斷一切諸覺應無相修  
羸提波羅密捨一切諸願應無願修羸提波羅密除  
一切諸行應無行修羸提波羅密是謂菩薩摩訶薩  
成就八法能淨羸提波羅密善男子喻如虛空無憎  
無愛菩薩修羸提波羅密無憎無愛亦復如是喻如  
虛空無有變易菩薩畢竟心無變易修羸提波羅密  
亦復如是善男子喻如虛空無有虧損菩薩畢竟修  
羸提波羅密心無虧損亦復如是喻如虛空無生無  
起菩薩修羸提波羅密心無生起亦復如是喻如虛  
空無有戲論菩薩修羸提波羅密心無戲論亦復如  
是喻如虛空不望恩報菩薩修羸提波羅密於一切  
衆生不望果報亦復如是喻如虛空無漏無繫菩薩  
修羸提波羅密離一切漏不繫三界亦復如是善男  
子菩薩行羸提波羅密時不作是念彼來罵我我能  
忍受亦不見罵者受罵者及所罵法不作是觀不作  
是戲論言彼空我亦空亦不作是思惟音聲如響何

由而出亦復不作是觀我是彼非又復不作是見彼無常我亦無常亦復不作是念彼愚我智亦不作是想我等應行忍辱善男子譬如有人求娑羅枝爲娑羅枝故資持利斧入娑羅林中至一大樹下斫其一枝餘枝不作是念彼已被斫不斫我等其被斫者亦不作是念我已斫斫餘者不斫二俱相於不生憎愛善男子菩薩摩訶薩行屢提波羅密時觀知一切法性如草木墻壁瓦石等而示現割截身體爲教化衆生故無憎無愛無憶想分別善男子是爲菩薩行屢提波羅密與虛空等善男子云何菩薩摩訶薩行毗

梨耶波羅密與虛空等善男子菩薩成就四法行毗梨耶波羅密與虛空等何謂爲四善男子若菩薩勤求一切善法而知一切法自性不成就以一切最勝供具給侍供養諸佛世尊然不見如來及所供侍之法善能受持一切諸佛所說妙法亦不見文字而可受持亦能成就無量衆生見衆生性卽是泥洹畢竟無生無起善男子是爲菩薩成就四法行毗梨耶波羅密與虛空等善男子若菩薩成就八法能淨毗梨耶波羅密何等爲八善男子菩薩爲淨身故發勤精進知身如影不著於身爲淨口故發勤精進知口聲

如響不著於口爲淨意故發勤精進知意如幻無所  
分別不著於意爲具足諸波羅密故發勤精進知諸  
法無自性因緣所攝不可戲論爲得助菩提分法故  
發勤精進覺了一切法真實性故無所礙著爲淨一  
切佛土故發勤精進知諸國土如虛空故不恃所淨  
爲得一切陀羅尼故發勤精進知一切法無念無非  
念故不作二相爲成就一切佛法故發勤精進知諸  
法入一相平等故而不壞法性善男子是爲菩薩成  
就八法能淨毗梨耶波羅密善男子喻如虛空無有  
疲倦菩薩於無量劫發勤精進無有疲厭亦復如是

喻如虛空悉能容受一切諸色然此虛空無有覆障  
菩薩爲容受一切衆生發勤精進平等無礙亦復如  
是喻如虛空能生一切藥草叢林然此虛空無有住  
處菩薩爲增益一切衆生諸善根故發勤精進無所  
依著無有住處亦復如是喻如虛空至一切處然無  
有去菩薩發勤精進爲至一切法故而無至無不至  
亦復如是喻如虛空非色而於中見種種色菩薩爲  
一乘故發勤精進而爲成就純至故示諸乘差別亦  
復如是喻如虛空本性清淨不爲客塵所汙菩薩發  
勤精進本性清淨爲衆生故現受生死不爲塵累所

染亦復如是喻如虛空性是常法無有無常菩薩究竟爲不斷三寶故發勤精進亦復如是喻如虛空無始無終不取不捨菩薩發勤精進無始無終不取不捨亦復如是善男子精進有二種始發精進終成精進菩薩以始發精進習成一切善法以終成精進分別一切法不得自性唯所集善根見是平等所見平等亦非平等善男子喻如工匠刻作木人身相備具所作事業皆能成辦於作不生二想菩薩爲成就莊嚴本願故發勤精進修一切業於作不生二想去離二邊亦復如是善男子是爲菩薩行毗梨耶波羅密與虛空等善男子云何菩薩摩訶薩行禪波羅密與虛空等善男子若菩薩成就四法行禪波羅密與虛空等何等爲四善男子若菩薩專其內心亦不見內心遮緣外界諸心亦不見外心行處以已心平等故知一切衆生心平等亦不依二法心及平等思惟法界定性無攝無亂知一切法性無有戲論是爲菩薩成就四法行禪波羅密與虛空等善男子若菩薩成就八法能淨禪波羅密何等爲八善男子若菩薩不依諸陰修禪不依諸界修禪不依諸入修禪不依三界修禪不依現世修禪不依後世修禪不

依道修禪不依果修禪是爲菩薩成就八法能淨禪  
波羅密喻如虛空無所依著菩薩修禪無所依止亦  
復如是喻如虛空無所愛戀菩薩修禪離諸染著亦  
復如是喻如虛空不著諸見菩薩修禪捨離諸見亦  
復如是喻如虛空無有諸慢菩薩修禪離諸憍慢亦  
復如是喻如虛空究竟無滅菩薩修禪善入法性究  
竟不退亦復如是喻如虛空不可破壞菩薩修禪不  
壞本際亦復如是喻如虛空無有變易菩薩修禪不  
變如如亦復如是喻如虛空非心離心菩薩修禪離  
心意識亦復如是善男子菩薩以平等心修禪非不  
平等心云何心平等若心不高不下無求無非求無  
作無非作無分別無非分別無行無非行無取無捨  
無聞無明無知無念無非知無非念不一不異非二  
非不二無動無不動無去無不去無修無非修心不  
緣於一切境界是謂平等心以菩薩心平等故不取  
於色去離眼色二法而修於禪以心平等故不取聲  
香味觸法去離意等二法而修於禪善男子喻如虛  
空火災起時不能焚燒水災起時不爲所漂菩薩不  
爲諸煩惱火之所焚燒不爲諸禪解脫三昧所漂受  
生自無定亂亂心衆生能令得定自行已淨不捨精

進與平等等示現差別而不見平等及不平等之相  
善能遍觀智慧眞性其心不爲愛見所覆於諸行中  
行無所著與虛空等善男子是爲菩薩行禪波羅密  
與虛空等善男子云何菩薩行般若波羅密與虛空  
等善男子若菩薩成就四法行般若波羅密與虛空  
等何等爲四善男子若菩薩以我淨故知衆生亦淨  
以智淨故知識亦淨以義淨故知文字亦淨以法界  
淨故知一切法亦淨是爲菩薩成就四法行般若波  
羅密與虛空等善男子若菩薩摩訶薩成就八法能  
淨般若波羅密何等爲八善男子若菩薩精勤欲斷  
一切不善法而不著斷見精勤欲生一切善法而不  
著常見知一切有爲法皆從緣生而不動於無生法  
忍善分別說一切字句而常平等無有言說善能辯  
一切有爲無常苦法於無我法界寂靜不動能善分  
別諸所作業而知一切法無業無報善能分別垢法  
淨法而知一切法性常淨善能籌量三世諸法而知  
諸法無去來今是爲菩薩成就八法能淨般若波羅  
密善男子喻如虛空非行無行菩薩行般若離一切  
行亦復如是喻如虛空無能破壞菩薩行般若一切  
諸魔無能壞者亦復如是喻如虛空性常寂靜菩薩

行般若覺見寂靜亦復如是喻如虛空性常無我菩薩行般若了知無我亦復如是喻如虛空性非衆生菩薩行般若離一切衆生見亦復如是喻如虛空性無有命菩薩行般若離一切命見亦復如是喻如虛空性無有人菩薩行般若離一切人見亦復如是喻如虛空非物非非物不可名字菩薩行般若離物非物見亦復如是善男子般若是寂靜句義無微覺故是不作句義自相淨故是無變句義無行相故是真實句義不發動故是不誑句義無有異故是了達句義入一相故是通明句義斷習氣故是滿足句義無

欲求故是通達句義能正見故是第一句義無所得故是平等句義無高無下故是牢固句義不可壞故是不動句義無所依故是金剛句義不可摧故是已度句義所作辦故是真淨句義本性淨故是無闇句義不恃明故是無二句義不積聚故是盡句義究竟盡相故是無盡句義無爲相故是無爲句義離生滅故是虛空句義無障礙故是無所有句義真清淨故是無處句義無行跡故是無巢窟句義無所倚故是智句義無識別故是無降伏句義無羣匹故是無體句義不受形故是知見句義知苦不生故是斷句義

知集無和合故是滅句義究竟無生故是道句義無  
二覺故是覺句義覺平等故是法句義究竟不變故  
善男子此般若不從他得自證知見如性行故知一  
切文字句義其猶如響於語言音隨應而報其辯不  
斷亦不執著文字言說菩薩摩訶薩如是能於一切  
言說中善能報答知諸音聲言說如響解不可得故  
不生執著亦不戲論善男子是爲菩薩行般若波羅  
密與虛空等爾時世尊欲重明此義而說偈言

離著而行施 普及適衆性 終已無礙心

亦不生分別 我淨故施淨 施淨故願淨

大方廣集經卷二

三

讀二

願淨菩提淨 道淨一切淨 無我我所想

離愛及諸見 捨除彼我相 施心如虛空

去離諸想施 無有望報心 捨嫉妒心結

施心如虛空 空非色無倚 無受想分別

亦無行及識 施時心亦然 如空益一切

始終無窮盡 解法施無盡 利益一切衆

如化人相施 不望所施報 慧者施亦爾

終不望其報 以慧斷結習 方便不捨衆

不見結及衆 如是施如空 知身如鏡像

知聲猶如響 知心如幻化 法性如虛空

不捨勝菩提 不求於二乘 於過去諸佛

常敬慎護界 不捨本願故 能於諸趣中

善成就本願 攝意護淨戒 如空無希冀

無熱惱高下 無濁無變易 淨戒者亦爾

如空受一切 水月不持戒 護戒者如是

淨戒如虛空 罵打瞋怒等 忍力故不瞋

無我及彼見 以去離二想 內純至善淨

外行亦清淨 純至故無瞋 順如法能忍

離諸見忍空 捨覺而離想 無願無希冀

捨諸行所取 無愛如虛空 不戲不懷恨

大方等入真經卷一二

三

讓一

無戲不求報 無漏忍者爾 無忍無罵者

彼人聲如響 非是及無常 無如是戲論

彼愚及我智 無生而示生 亦無是分別

是修無生忍 如斫娑羅枝 餘枝不分別

斷身無分別 此忍淨如空 勤修無所依

供佛無佛想 持法不著文 度眾無眾想

淨身淨法身 淨口無言說 淨心無意行

具諸波羅密 具助菩提法 淨土如虛空

成就辯總持 求如是佛法 如空度無倦

故能生叢林 遍至無形色 精進亦如空

常淨如虛空 無始亦無終 入精進亦爾

無始無終成 如機關木人 所作無分別

行者無二想 其進如虛空 知止住內心

攝外境界心 自心彼心等 依止無心禪

諸法性常空 以無漏智知 不依陰界入

亦不依三界 不依於三世 不依界道果

如空常無依 修禪者亦爾 空無愛見慢

修禪者亦爾 空無退壞變 修禪者亦爾

平等寂解脫 智者不緣界 無結無禪等

是故禪如空 我淨衆生淨 智淨識亦淨

大方等入真經卷十二

三

讀一

義淨文字淨 法淨界亦淨 斷不善及習

大士集諸善 知有爲緣生 無生不著滅

善分別文字 說無常苦法 示現受業報

言有垢及淨 知法性常淨 而籌量三世

空無行非行 慧無行亦爾 如空無能壞

無我人壽者 非物非無物 拔斷二邊見

知句假不染 不變真實句 滿足通達句

達義慧等句 等不動牢固 金剛度淨句

明盡無盡句 無爲虛空句 處巢識別句

降伏體智句 斷集滅道句 法覺智慧句

如響隨聲應 無盡辯亦爾 說法無所依

此慧淨如空

大方等大集經卷第十二

音釋

卷第十

濡軟

同對隊怨

迮

論迫也

蠱古

卷第十一

捷椎

乾地此云鍾亦云磬

隨有

瓊

同

搏

搏 蕞 減輕 傷也

咩

也 抵 邱

帶 帝

歛 忽

毓 施

粗

緒 又 繪 似 泉

第二紙

十八行

南藏

作

第六紙

六行

應字

下

第十一紙

十行

以字

從南改已

大方等大集經卷十二

三

讓一

卷第十二

閱

礙 碑

灑

漂 同

第四紙

二十行

南藏

作

大方等大集經卷十二計字壹萬叁百捌拾捌箇

折足制錢拾伍千肆百貳拾陸文

光緒七年十二月常熟刻經處識

大方等大集經卷第十二

此慧淨如空

常劉叔涵刊刻

大方等大集經卷第十三  
北涼天竺三藏曇無讖譯

虛空藏菩薩所問品第六之二  
四無量心  
佛復告虛空藏言善男子何謂菩薩行功德與虛空  
等者若菩薩聞佛無量法廣大如虛空故發薩婆若  
心彼作是念如薩婆若無量佛無量自在覺無量於  
如是無量中生無量欲精進不放逸行爲佛道故當  
行無量菩薩所行之法所以者何如諸佛無量功德  
莊嚴身故我亦爲莊嚴其身應成就無量善根如諸  
佛無量功德莊嚴口莊嚴意莊嚴道場莊嚴佛土故

大方等大集經卷十三

一  
讓三

我亦當莊嚴口意道場佛土應成就無量善根我當  
教化無量衆生爲成就善根我於無量生死中爲成  
就善根故不生厭倦諸佛世尊有無量國土無量智  
慧無量神通彼諸衆生無量行無量心無量諸根差  
別於生死中受無量苦惱聚起諸煩惱我爲入無量  
諸佛法爲捨無量衆生所行諸根生死苦惱聚故成  
就無量善根菩薩以如是正觀之心所作功德與諸  
波羅密相應與四攝法相應與四無量心相應與助  
菩提法相應成就衆生受持正法供給供養諸佛世  
尊及淨菩薩所行相應法如是等所作無量功德與

虛空等以衆生性無量故佛智慧無量故法界無量故所修亦無量如虛空衆生性佛智慧法界無處不至一切衆生皆得蒙益菩薩所作功德亦復如是至一切處利益衆生以無依著故以願方便力故善男子菩薩能知是行功德與虛空等善男子云何菩薩行智與虛空等者若菩薩從善知識得聞法已善順思惟所作諸行終不放逸修少境界想已受無量想受無量想已得如是智明得是智明已得陰方便智得界方便智得入方便智得諦方便智得十二因緣方便智知衆生垢亦知垢性知衆生淨亦知淨性所

謂知衆生有染心如實知有染心無染心如實知無染心有慧心如實知有慧心無慧心如實知無慧心有癡心如實知有癡心無癡心如實知無癡心有諸煩惱心如實知有諸煩惱心無諸煩惱心如實知無諸煩惱心彼菩薩不見有垢心爲卑無垢心爲勝所以者何以菩薩入不二性清淨法門智故如法性我性亦爾如我性無我性亦爾如無我性諸法亦爾性清淨故若入一切諸法性清淨者則不見諸法有垢有淨亦不見諸法文字相貌不受不著故亦不見諸法障礙蓋纏及不障礙蓋纏菩薩思惟無量境界離

心識二法名之爲智不名爲識喻如虛空無心意識  
菩薩亦復如是離心意識知諸法性與虛空等智行  
無礙過諸礙故善男子是爲菩薩行智與虛空等善  
男子云何菩薩成就不離如如來所許念佛者菩薩  
若在阿練若處或在樹下或在曠野或在露處以得  
定力故能攝心不著諸緣以不散亂心善攝所念以  
行相觀如來成就三十二相八十隨形好莊嚴其身  
取一一相貌爲成就已身故心向一切智地於如來  
身憶念放鬘網光明菩薩以得解希望觀如來身滿  
一由旬二由旬三四五由旬乃至百由旬若過百

由旬以得解希望觀坐道場或見轉法輪或見現種  
種威儀說法調伏衆生或見於一佛世界施作佛事  
或五佛世界或十二三十四十五或百佛世界  
施作佛事乃至百千無量世界施作佛事得解希望  
觀自見隨意若聽法若供養給侍諸佛世尊於餘威  
儀隨意自在菩薩如是觀如來色身已憶念佛功德  
或觀戒或觀定或觀慧或觀解脫或觀解脫知見或  
觀力無所畏或觀佛不共法或觀菩薩本行或觀成  
就佛地普憶念如來成就功德已憶念如來業何等  
相貌云何造業身造卍口造耶意造耶威儀造耶可

見耶不可見耶可說耶不可說耶何國造耶幾種身  
造耶如是種種憶念勝業成就不可思議諸善根已  
觀如來法諸佛世尊以法身故名爲如來不以色身  
彼菩薩不見色是如來不見相是如來不見種性是  
如來不見陰界諸入是如來不見威儀是如來不見  
過去未來現在世是如來不見因是如來不見緣是  
如來不見所以是如來不見和合是如來不見有是  
如來不見無是如來不見成就是如來不見敗壞是  
如來不見彼有如來不見此有如來不見如來在何  
所不見如來不恃如來不分別如來不得如來喻如

虛空無有陰界入名非不利益衆生諸佛世尊無有  
陰界入名亦非不利益衆生善男子是爲菩薩不離  
如如來所許念佛善男子云何菩薩不離如如來所  
許念法者若菩薩念法所謂四念處四正勤四如意  
足五根五力七覺分八聖道分三脫門四聖諦甚深  
十二因緣六波羅密菩薩所應學藏不退轉輪淨三  
境是爲菩薩所應念法云何應念念捨念欲離念滅  
念無來無去念無巢窟念無自性念出世間念解達  
念盡念無生念無取念無漏念無爲念涅槃無自性  
作如是念於法中猶有法想所以者何以有想故則

有動念有動念故則住顛倒住顛倒者無有念法若離念法非法二想知一切法是無生已斷法想故得無生忍得無所得無所有故善男子是爲不離如來所許念法善男子云何菩薩不離如來所許念僧者僧謂四雙八輩僧中或是阿羅漢向阿羅漢果或是阿那含向阿那含果或是斯陀含向斯陀含果或是須陀洹向須陀洹果是爲聲聞僧復次有僧所謂不退轉菩薩得決定忍上聖正位已離諸相恃著戲論次得如來功德無間彼菩薩念如是等大菩薩衆應供養讚歎合掌給侍右遶禮敬是良祐福田是

第一僧入聖衆數是僧所應作事皆已成辦是菩薩念僧親近菩薩僧不親近聲聞僧彼菩薩雖憶念僧不取僧數不取有數知僧是無爲憶念無行無變異無生無滅作如是憶念不生心行境界善男子是爲菩薩不離如來所許念僧善男子云何菩薩不離如來所許念捨者所謂捨財捨法復次有捨身及命捨一切邪道復次有捨不取一切法所以者何有取者則無捨若不取者名爲究竟捨究竟捨中則無有求無求者則不望報不望報故謂爲真實捨者若菩薩行如是堅固捨隨捨發願若捨時及發願時不

見菩提及佛法而專念捨念過去諸菩薩行道時云  
何行捨我今云何行捨將無不及爲智者所譏耶及  
能一切捨捨已分別所捨誰是捨者捨何等物誰作  
憶念如是分別已都無所得不見捨者所施物及所  
憶念是爲菩薩不離如如來所許念捨善男子云何  
菩薩不離如如來所許念戒者若菩薩持戒至解脫  
處威儀行成就乃至微戒畏如金剛恆修淨命善護  
持戒菩薩自念戒攝身口是無作相而謹慎奉行修  
勝正命於薩婆若心終不廢捨純至不動亦終不捨  
大慈大悲攝取教誨破戒衆生甯捨身命不求謀乘

大方等文集卷之三

六

護三

是名爲戒菩薩念勝戒不瑕缺戒不荒穢戒不求戒  
不染戒無濁戒智者所歎戒菩薩念如是等戒不恃  
持戒不毀破戒不稱已德不譏彼過終不捨戒亦不  
依戒亦不住戒雖捨一切諸所恃著而行色行是爲  
菩薩不離如如來所許念戒善男子云何菩薩不離  
如如來所許念天者若菩薩念天所謂念欲界天或  
色界或無色界天念欲界天持戒果報故受適意色  
聲香味觸以天五欲遊戲娛樂天衣飲食自恣滿足  
一向受愛喜適意樂菩薩作是念此一切興盛皆當  
衰滅是諸天等亦當無常變異由放逸故不造善根

先有善業今悉當盡此諸天等雖生天上猶未脫地  
獄畜生餓鬼之分菩薩作是念已不希望生欲界天  
處唯除兜率天宮兜率宮中有一生補處菩薩於一  
切菩薩行以到彼岸一切諸地一切神通一切諸定  
一切陀羅尼一切辯才一切菩薩事於一切方便等  
以度彼岸但憶念如是功德於此天中心生欣仰若  
欲生天者當願生如是天中菩薩發心言我何時當  
得如是天身菩薩復念色界諸天此諸天等由諸禪  
四無量心果報故生彼天處已過欲界欲患一心處  
定以喜爲食一向知受第一樂報菩薩作如是念彼

色界諸天受少味故用爲歡喜無常有常想苦有樂  
想無我有我想無涅槃有涅槃想此色界諸天亦有  
無常變異未脫地獄餓鬼畜生之分是菩薩不願生  
色界諸天處唯除淨居天卽彼入涅槃不還此間者  
菩薩作是念此是清淨諸天已脫五道流轉生死是  
菩薩以如是故生敬重之心亦不願樂求生彼處菩  
薩復念無色界諸天受無色定果報已過欲界色界  
心處寂定菩薩作是念此無色界諸天雖見佛聞法  
及供養僧此諸天等不知求出無色界法假令久住  
會當變滅未脫地獄餓鬼畜生之分是故於彼天處

亦不願生但作是念我當作天中天如來應供正遍  
知是菩薩雖念諸天不依欲界色界無色界天處而  
於三界衆生起大悲心是爲菩薩不離如如來所許  
念天善男子云何菩薩行諸法平等如涅槃者若菩  
薩知入諸法平等如涅槃見一切衆生性同涅槃知  
已入涅槃者無陰界諸入如是菩薩見衆生性同涅  
槃過諸陰界入見如影如夢無有生死而現生死凡  
夫衆生所因結使造煩惱業造煩惱業已受無量苦  
報菩薩以般若波羅密力故善觀結使斷令不生亦  
不因彼作業而受苦報得至涅槃平等之處名之無

爲過一切算數智道不捨本願故遊戲大慈已到慧  
方便彼岸已入佛神通力已能善知分別諸想自己  
得度度未度者自己得解解未解者自己得安安未  
安者自己得涅槃使未得者得於涅槃生死無有二  
想是爲菩薩行諸法平等如涅槃善男子云何菩薩  
善分別行相者若菩薩翹勤精進求勝善法於甚深  
法門心入籌量清淨通利分布慧明得大智明門以  
此大智明門力故知一切衆生心行所趣總說一一  
衆生有八萬四千諸行皆能了知所謂貪欲行二萬  
一千嗔恚行二萬一千愚癡行二萬一千等分行二

萬一千是爲八萬四千諸行一一衆生皆有是行若廣說者則有無量行一一行相門中知有八萬四千諸根一一根門中知有八萬四千種差別解盡知諸行諸根諸解差別相知所應修習相云何知差別相知此諸行諸根諸解是貪欲相是瞋恚相是愚癡相是等分相是滅相是增相是住相是達相是名知差別相云何知所應修習相知諸行諸根諸解無常相苦相無我相空相寂滅相離相如實相涅槃相相自空相相自離相若能知如是等諸行諸根諸解如如來成就諸行無障礙智知一切衆生諸行諸根諸解

差別相菩薩亦次如來智知而不捨菩薩所行教化衆生無有疲倦是名善分別行相善男子云何菩薩持諸佛法寶藏者善男子如來藏無盡亦無量至一切處悅可一切衆生如衆生諸行諸根諸解無量阿僧祇不可思議不可稱不可量諸佛法寶藏無量阿僧祇不可思議不可稱不可量亦復如是佛法寶藏文字假令一切衆生如阿難等一劫乃至百劫不能受持讀誦能令通利餘義所以者何如來一切法寶藏唯有一義所謂離欲義寂滅義涅槃義若菩薩聞如來法寶藏已隨力所受受持讀誦通利善順正觀

如所受行菩薩入法藏門堅持思惟不依一切相行  
則得陀羅尼門三昧門得陀羅尼門三昧門已能持  
一如來法寶藏文字及義若二若三若四若五若十  
二十三十四五十若百若干若百千乃至無量無  
邊阿僧祇不可思議不可稱不可量無有量過諸量  
於一切諸佛法寶藏心不散亂受持讀誦通利文字  
及義廣爲人說依義不依文淨意成就所聞說法乃  
至一句文義不失能淨辯門善能巧說悅可衆心爲  
諸佛所歎亦能降伏諸魔外道及供養三寶乃至不  
見一法異於法性不壞本際不動於如如來所覺了  
法性以知一切法性如如來所覺故乃至不見一法  
不入佛法者所以者何如來知一切法性如幻無成  
就故知一切法性如野馬無所取故知一切法性如  
鏡中像不至彼故知一切法性如夢不真實故知一  
切法性如響從緣起故知一切法性虛空無實故知  
一切法性無相無分別故知一切法性無願無發動  
故如來如實知一切法性如是相菩薩如是知一切  
法性無性能持諸佛法寶藏乃至一切非念非不念  
是爲菩薩持諸佛法寶藏善男子云何菩薩分別衆  
生從始以來清淨而教化衆生者若菩薩爲教化一

切衆生故修於大慈大悲時作如是思惟何等是衆  
生作是念言此諸衆生但假名字顛倒虛假謂爲衆  
生一切衆生本際清淨畢竟無生無起但因虛妄愚  
癡故造種種業造種種業已受無量憂悲苦惱喻如  
有人夢中劫盜他物爲王者所捉種種苦治夢作賊  
人虛妄憶想受諸苦惱作是念言我何時當得脫此  
苦惱是人夢中實無成就無所覺知一切凡夫及一  
切諸法皆亦如夢無有覺知爲顛倒所覆受無量妄  
想憂悲苦惱亦復如是菩薩作是念言是諸衆生我  
應令如實覺知諸法使脫妄想苦惱於諸衆生中亦  
不見衆生性而不捨大悲教化衆生是爲菩薩分別  
衆生從始以來清淨而教化衆生善男子云何菩薩  
善順發行成就佛法者若菩薩聞甚深微妙於諸世  
間最勝佛法發大欲精進我應成就此甚深微妙於  
諸世間最勝佛法如是善思惟分別是何等法與何  
法相應是何等法知何等法菩薩作是念言無有法  
與法相應者無有法與法不相應者無有法知法者  
無有法不知法者此諸法性鈍性無性故是一切法  
從因緣生無有定主而能隨意莊嚴有種種果報相  
諸法無性故布施是莊嚴大富相布施得大富不離

因故布施不知天富大富不能知施持戒是莊嚴生  
天相持戒得生天不離因故多聞是莊嚴智慧相多  
聞得智慧不離因故思惟是莊嚴斷結相思惟得斷  
結不離因故思惟不能知斷結斷結不能知思惟菩  
薩如是憶念諸法無生能莊嚴相是故布施已迴向  
薩婆若成就檀波羅密行是菩薩檀波羅密則能具  
足佛法持戒迴向薩婆若成就尸波羅密行是菩薩  
尸波羅密則能具足佛法修羼提波羅密迴向薩婆  
若成就羼提波羅密行是菩薩羼提波羅密則能具  
足佛法發毗梨耶迴向薩婆若成就毗梨耶波羅密

行是菩薩毗梨耶波羅密則能具足佛法入禪定迴  
向薩婆若成就禪波羅密行是菩薩禪波羅密則能  
具足佛法淨般若迴向薩婆若成就般若波羅密行  
是菩薩般若波羅密則能具足佛法菩薩如是善順  
行時不見一法無因無緣而生者亦不著因緣自善  
順入一切法如我無生無起一切法無生無起亦復  
如是我空一切法空亦復如是如我離一切法離  
亦復如是知一切法入平等如性非作非不作是爲  
菩薩善順發行成就佛法善男子云何菩薩不退諸  
通於諸佛法悉得自在者若菩薩戒身真淨心定不

動得大智光明已成就福德智慧資糧已到諸波羅密彼岸已成就四攝已修四梵行已修欲進念慧定以善修四神足故得五神通諸菩薩本業淨故勤進不廢捨故常不散亂行故善伏結使故離念聲聞辟支佛心故受持方便故攀緣上地諸法故無我無依行故是以菩薩不退諸通是故諸菩薩究竟知諸法無退知諸法與法性等無有變異如虛空無變是爲菩薩不退諸通於諸佛法悉得自在善男子云何菩薩入甚深因緣法知逆順因緣法善知出知離知生知滅知集知盡善知衆生以何因緣故受垢離垢捨垢得淨乃至不見一法有垢有淨知一切法性相清淨亦不得清淨法相以我甚深故知一切法甚深以我離故知一切法離以我無二故知一切法無二以眼色二俱離故乃至意法亦離則入第一義以世諦故假名諸法亦不執著真諦世諦是爲菩薩入甚深法門諸聲聞辟支佛所不能入善男子云何菩薩於十二因緣善得勝智方便離二邊諸見者若菩薩知一切緣生法屬他所攝屬因屬緣屬和合屬所由此諸法皆從境界緣生各有所因各有所依諸法各各自

無心無相分別譬如外諸藥草叢林及諸樹木等皆  
無諸根無記無知依諸大故便得增長各各無相分  
別內有諸法亦復如是依造業增長一切諸法無我  
人衆生壽命亦無作者受者諸法生時無能生者滅  
時無能滅者菩薩作是念言是諸緣生法各無自性  
無自性者他不能生所因亦無性所緣亦無性無自  
性者則無他性若法無自性他性者則無生無能生  
未生不可生已生亦不生若未生非未生不生者則  
究竟無生無能生是故一切諸法皆無生無起但以  
名字故假名從因緣生而實無生亦無斷無常所以  
者何若法有生性者則當有滅則是斷見若無滅者  
卽有常見離斷常見故當知一切諸法皆無有生是  
爲菩薩於十二因緣善得勝智方便離二邊諸見善  
男子云何菩薩爲如來卽所卽如如不分別智方便  
者若菩薩於甚深法得現前知見力離一切倚著過  
諸戲論得無終無始無生法忍如來盡知諸菩薩所  
成就根已以如來卽卽之所謂受決定三菩提記是  
如來卽無錯無謬無諸障礙無諍無競不可沮壞無  
能非者無能廢者得如來卽願行成就智水所灌菩  
薩爲如是卽所卽所謂究竟無生無起卽空卽無相

印無願印離染印寂滅印涅槃印菩薩智行成就不壞如性不變法界不離本際於諸法中不見上中下黑白等差別菩薩亦見一切衆生爲此印之所印無憶想分別不捨本大誓願是爲菩薩爲如來印所印如如不分別智方便善男子云何菩薩入法界性門見一切法平等性若菩薩見諸法界無處不至無來無去無生無滅無相無起無戲無行菩薩作如是思惟此諸法等皆同法界如法界是離欲界離塵垢故是無生界不可作故是無滅界無滅盡故是無來界不入根門故是無去界無所至故是不可安界無形質故是無巢窟界無依止故是真實界三境分斷故此法界中無眼界無色界無眼識界如法界一切法界亦如是故名一切法入於法界乃至無意界法界意識界如法界一切法亦如是故名一切法入於法界是菩薩知一切法入於法界知地界法界無二無別水界火界風界法界亦無二無別欲界法界亦平等無二無別色界無色界有爲界無爲界法界亦平等無二無別如是知無心境界及覺是爲菩薩入法界性門見一切法平等性善男子云何菩薩淳至堅固喻如金剛心住不動於此大乘者若菩薩以

直心行成就淨淳至以不退畢竟不滅勤進以無礙  
大慈以無倦大悲以普至方便得成就真實觀慧無  
礙等法皆悉成就菩薩見一切衆生有垢有濁凡愚  
麤獷拒逆不順是故菩薩爲教化一切羣生故不廢  
精進見此生死有無量過患憂悲苦惱等不退於來  
際莊嚴亦解無量無邊阿僧祇諸佛法爲成就難集  
難持難滿諸佛法故種諸善根而能入如來無量法  
寶藏衆生性無量故法性無量故虛空性無量故爲  
受持一切如來法寶藏故不捨精進聞一切法空無  
相無願無作無生無起解了分別觀行身證成就未

具足佛法終不申道證於實際善入諸禪解脫三昧  
亦不厭離欲界而現受生已離陰界諸入無形無色  
無行而隨衆生性隨意示現種種形色而爲說法轉  
菩薩輪示大涅槃亦不捨菩薩行入如是不思議法  
門知一切法無性相不動不壞不散於此大乘不退  
轉如金剛寶珠能鑑餘寶餘寶無能鑑此珠者諸菩  
薩亦復如是能以聲聞辟支佛乘度無量無邊衆生  
令入涅槃而自不滅度亦不退究竟大乘是爲菩薩  
淳至堅固猶如金剛心住不動於此大乘善男子云  
何菩薩自淨其界如諸佛界者若菩薩知一切法無

界無作界至一切處無至無不至若菩薩見法發六情皆知是佛法亦不見凡夫法佛法有異作是念此一切法皆是佛法佛法至一切處故一切諸法及佛法但假名字亦非是法亦非法是故我等不應取著以自界淨故知諸佛界淨此法與平等眼界是佛界耳鼻舌身意法界是佛界我不應分別有尊有卑菩薩如是至一切法平等界是爲菩薩自淨其界如諸佛界善男子云何菩薩得陀羅尼終不失念者若菩薩已得成就陀羅尼行云何陀羅尼行善男子陀羅尼行有三十二何等三十二修於得法爲陀羅尼故修於欲法修於尊法修於向法修敬仰法修於樂法修求法無厭修親近供養多聞智慧者修於和尚阿闍梨所無憍慢心尊重給侍修如法教誨無所拒逆修於說法人所生世尊想不求其短修於受持正法開示解說修所得法無所吝惜修無希望而行法施修求智慧根栽修如所聞法善順思惟修所聞法堅固受持修於梵行無有休息修樂遠離行阿練若行修心常寂靜修勤行諸念修順行六和敬修於諸長宿無掉慢行修於一切衆生中無礙心修緣生法得隨順忍修三脫門正觀心無驚怖修四聖種

行而不驚疑修勤受持諸佛正法修爲衆生行於大  
慈修受持正法不惜身命修大智行不生憍慢修常  
教化衆生而無厭倦善男子是爲三十二種修陀羅  
尼行菩薩修已得如是陀羅尼門以得是陀羅尼門  
故能總持一切諸佛所說不忘不失陀羅尼者所謂  
於如所聞法不忘不失以念而念以意分別以進能  
覺於諸文字入無邊涯於諸音音隨類善解言辭辯  
說無有滯礙於不了義經善能進入於了義經進入  
微覺於世諦有分別智於第一義諦知無言說於諸  
諦有分別智於四念處有不忘智於四正勤等無壞

智於四神足有遊戲智於諸根門有差別智於諸力  
中得無勝智於七覺分覺一切法如性智於八聖道  
無退沒智於定法中得善住心於慧法中得遍至智  
於明解脫得隨順智於諸辯中得深入智於諸神通  
得生起智於諸波羅密得分別智於四攝法得方便  
智於讚法處授不及智於諸經義得無分別智於諸  
文字得無盡智於一切衆生得稱足智隨所受解得  
說法智於一切文字得所因辯智於一切垢淨得如  
實覺智於一切法得無障礙明智是爲陀羅尼得陀  
羅尼平等心者去離憎愛堪受法雨斷一切結使熱

惱順諸助道法是爲陀羅尼菩薩住此陀羅尼故常  
行無失是爲菩薩得陀羅尼終不失念善男子云何  
菩薩得無障礙如來加持辯者若菩薩善淨淳至善  
護戒聚拔諸慢根離彼我想諸佛世尊知如是菩薩  
是大法器令持正法以佛神力及自善根力故得捷  
辯得疾辯得無礙辯得無滯辯得巧說辯得甚深辯  
得衆音具足辯得善莊嚴辯得無滅辯得無畏辯得  
妙偈讚辯得快說修多羅辯得善說譬喻本緣辯得  
無壞勝辯得分別句無盡辯得圓足辯得威德無違  
辯得說法不唐捐辯得斷衆疑辯得利應辯得分別

文字不錯謬辯得悅可衆辯得問答方便辯得以法  
降伏一切外道辯已成就如是等二十四辯此諸辯  
修行二十四種因故能得成就何等二十四善男子  
若菩薩不違逆師長教故能得捷辯不詔曲故能得  
疾辯捨離煩惱故得無礙辯無我行故得無滯辯離  
兩舌故得巧說辯入因緣法無際故得甚深辯行種  
種施故得衆音具足辯嚴飾如來塔廟故得善莊嚴  
辯不捨菩提心故得無滅辯善護戒聚故得無畏辯  
施種種幢幡華蓋寶鈴故得妙偈讚辯恭敬供養給  
侍諸尊及師長故得快說修多羅辯昔植修習無量

善根故得善說譬喻本緣辯不輕賤惡趣衆生故得  
無壞勝辯施無量寶藏故得分別句無盡辯眞實言  
說無麤獷故得圓足辯講說法時無諍競故得威德  
無違辯以德淳淨順法律行故得說法不唐捐辯不  
恪於法不恃已德故得斷衆疑辯求法之時不威逼  
他生恭敬心故得利應辯常省己過不譏彼缺故得  
分別文字不錯謬辯等潤衆生不望報故得悅可衆  
辯受持大乘不求小乘故得問答方便辯不著我見  
入平等性故得以法降伏一切外道辯是名二十四  
種成就諸辯因善能隨彼衆生所應受解說法無有

錯謬所受法者亦不退失是爲菩薩得無障礙如來  
加持辯善男子云何菩薩得自在示現受生死者若  
菩薩成就十二法得自在示現受生死何等十二親  
近眞善知識故消除我見故成就戒身故善知入出  
定故並修智慧方便故善知深入諸通遊戲故如實  
觀知諸法無生無起故淨本願種故常不捨大慈大  
悲故知一切法如幻化故知一切法如夢想故一切  
諸佛加威神故是爲菩薩成就十二法無生現生無  
起現起而現一切生死於一切諸佛大會示現其身  
在在佛國皆現受生而常不動於眞法身是爲菩薩

得自在示現受生死也善男子云何菩薩破諸怨敵  
去離四魔者若菩薩翹勤修習觀五陰如幻得離陰  
魔觀諸法性淨故得離煩惱魔觀一切法從緣生性  
不成就故得離死魔觀一切法緣所莊嚴是無常敗  
壞相故得離天魔菩薩如是觀故得離四魔發趣菩  
提終不懈息所有障菩提魔業菩薩皆能遠離何謂  
魔業所謂心向小乘是爲魔業不護菩提心是爲魔  
業於衆生生異想是爲魔業行施望報是爲魔業爲  
受生故持戒是爲魔業有色想行忍是爲魔業爲世  
事精進是爲魔業於禪生著味想是爲魔業於慧生

二ノ等二集經本二

三

讓二

戲論是爲魔業厭倦生死是爲魔業修諸善根而不  
迴向是爲魔業厭惡煩惱是爲魔業犯罪覆藏是爲  
魔業憎嫉菩薩是爲魔業誹謗正法是爲魔業不受  
正法是爲魔業不知報恩是爲魔業不進求諸波羅  
密是爲魔業不敬順法是爲魔業憒惜於法是爲魔  
業爲利養說法是爲魔業輕毀禁者是爲魔業嫉持  
戒者是爲魔業學二乘行是爲魔業希望正位是爲  
魔業捨離大慈而觀無生是爲魔業欲證無爲法是  
爲魔業厭離有爲功德是爲魔業不愍衆生是爲魔

業不謙下尊長是爲魔業習行兩舌是爲魔業諛詔  
多姦是爲魔業顯已淨行是爲魔業作惡不恥是爲  
魔業不流布法是爲魔業以少功德爲足是爲魔業  
不遮結使是爲魔業不捨心垢是爲魔業忍沙門垢  
是爲魔業善男子若親近行一切不善法遠離一切  
善法盡是魔業善男子是謂諸魔業行是業者障菩  
提道彼諸菩薩已過捨離能正受行故云何爲正受  
行若菩薩成就四法能正受行何等爲四一者於諸  
波羅密法無懈退行二者不捨欲進及不放逸三者  
正住方便大慈法中四者入甚深無愛無巢窟法門

善男子菩薩成就此四法正受行故能破諸怨敵是  
爲菩薩能破諸怨去離四魔善男子云何菩薩莊嚴  
功德資糧利益衆生者若菩薩善根迴向向無等等  
若有所種善根若布施若愛語若利行若同事盡以  
施與一切衆生以淨戒聚故得自在力用此自在力  
故隨諸衆生所應愛樂而化度之以種功德無厭故  
得無盡寶手用此無盡寶手能施衆生無量富樂以  
求無邊智慧資糧故得無礙陀羅尼辯用此無礙陀  
羅尼辯能總持一切諸佛所說能說妙法悅可衆心  
以善調身心故不退諸通用此不退諸通力故能過

無量佛刹以無數方便度多衆生以常勤求法無疲  
倦故得一一毛孔出無量法門用出無量法門力故  
能常以法施利益衆生以並修慧方便波羅密故得  
分身智用此分身智力故能於諸趣中在在現身化  
度羣生常以無相敬侍諸佛故得無狀見聞以此無  
狀見聞力故其有衆生得見聞者彼諸衆生乃至爲  
作大涅槃因是爲菩薩莊嚴功德資糧利益衆生善  
男子云何菩薩世無佛時能作佛事化度衆生者若  
菩薩已成就菩薩十力已於菩薩四無畏中而得自  
在已於菩薩十八不共法中不從他受已修如來力

無所畏不共法等已得遊戲首楞嚴三昧已於四辯  
得智力自在已於諸佛法得灌頂正位於一切諸菩  
薩行得次佛神力若有菩薩成就如是等法者若諸  
佛土衆生應見佛身而受化者然彼佛土世無佛時  
卽於彼國而現入胎現初生時現出家時現坐道場  
轉法輪時現捨壽命來入涅槃時亦能示現大般涅  
槃亦現法住時節久近亦復不捨菩薩行法亦不用  
所化以爲滿足是爲菩薩世無佛時能作佛事化度  
羣生善男子云何菩薩得海印三昧能知一切衆生  
心行者若菩薩多聞如海成就慧聚常勤求法菩薩

爲聞法故盡能施與珍寶庫藏爲聞法故盡能施與  
僕從給使妻子眷屬爲聞法故捨家飾好嚴身之具  
爲聞法故謙下給事爲聞法故捨國土榮位及己身  
命菩薩以如是等無數方便勤求法門而不恃所行  
菩薩爲聞法故去至一山旬乃至百由旬爲聞一四  
句偈受持讀誦廣爲人說不捨是精進是菩薩自成  
就多聞於一切衆生大悲心無愛心不望報心乃  
至一衆生不生輕賤而爲說法從一日乃至七日而  
無食想乃至命終不捨說法以說法善根迴向海印  
三昧隨所聞法受持讀誦通利善知義趣不依文字

眞實堅持終身不捨菩薩發大欲精進以此大欲精  
進力故不久便得海印三昧得此三昧已卽得自然  
無量阿僧祇百千萬法門得無量阿僧祇百千萬億  
修多羅不從他聞自然能說一切諸佛所說悉能受  
持能了一切衆生心行善男子喻如閻浮提一切衆  
生身及餘外色如是等色海中皆有印像以是故名  
大海爲印菩薩亦復如是得大海印三昧已能分別  
見一切衆生心行於一切法門皆得慧明是爲菩薩  
得海印三昧見一切衆生心行所趣善男子云何菩  
薩知諸塵界無礙者若菩薩以眼空故知色亦空以

色雜故知眼亦離耳鼻舌身亦如是意空故知法亦空以法離故知意亦離菩薩如實知空性離性於內外法無有障礙知諸結本性淨故則不起使於一切法無所有著以不見諸法著處著法著者是爲菩薩知諸塵界無礙善男子云何菩薩威儀行成就離諸闇冥得勝光明於諸法中得自然智速得成就一切智行者若菩薩發起所作修習正行諸業盡是如來所許智者所讚所謂身口意業以行此業故悅可諸佛及餘賢聖善知識等所造諸業無能譏嫌最勝無上無與等者無能毀損所作諸業終不悔退所作諸

業不雜愚癡所作諸業皆能觀知所作諸業終不動轉所作諸業究竟吉祥是菩薩知所作業非憍慢所造慧所作業非愚癡所造如是所作善業一切三昧諸陀羅尼門悉現在前不從他聞菩薩若見諸佛若不見諸佛終不退轉助菩提道諸善根若遇適意善知識不滿意善知識不退菩提法是菩薩過一切障礙地離一切諸魔結使修三解脫般若波羅密力故疾得佛道自然道一切智道如來道是爲菩薩威儀行成就離諸闇冥得勝光明於諸法中得自然智速得成就一切智行爾時世尊欲重宣此義而說偈言

已離過無礙

慧功德莊嚴

彼離諸著相

迥向無上道

捨我慢憍慢

慧者莊嚴智

無障礙解脫

具足一切智

非色非種性

念佛非功德

常憶念法身

是念佛所許

離欲性寂靜

非相非明闇

無心無意行

如是名念法

聖無爲無愛

無諸煩惱染

以解脫得稱

名念僧無礙

已捨一切受

無陰界入行

解脫諸動念

名究竟念捨

不依無漏戒

不行身口意

不生過三有

名念無漏戒

如天淨無垢

咒率灌頂天

三才等入套經卷一三

三

讓三

憶念自業報

當作天中天

持世尊正法

捨離諸煩惱

解脫法非法

是持世尊法

如佛得道相

受持法亦然

善思惟真際

無法可攝持

如我性淨故

諸法性亦淨

知衆生如相

而教化衆生

不見衆生增

亦復不見滅

說斷顛倒想

教化無量衆

說諸陰界入

不異於佛界

知如虛空性

則入於佛界

言語諸文字

猶如呼聲響

知非內非外

卽得陀羅尼

受持讀誦利

進求說諸法

無我無法想

安住陀羅尼

持諸佛所說 善說悅衆心 不失諸禪定

是陀羅尼力 不持不誦文 不積集諸法

常說法無礙 如龍降大雨 無住無障礙

說無量契經 不生衆生想 慧者得是辯

以佛力說法 莊嚴自威儀 悅衆隨所樂

是辯佛所許 知法實性者 知與虛空等

無我人壽命 如是持佛法 衆生同涅槃

究竟不生滅 得是不動忍 是爲不放逸

見諸陰如幻 諸界如法性 六入如空聚

得離於陰魔 知使如浮雲 究竟無和合

於法無妄想 則離煩惱魔 知衆生不生

無生則無死 諸法無去來 如是過死魔

無愛無動者 行道無道想 無我人行悲

則能降衆魔 知智識平等 不住爲無爲

知衆心如幻 心健無能壞 此彼無障礙

成就勝法船 渡衆無衆想 是謂大船師

知空無有我 淨生死渴愛 將導渡衆生

是謂大導師 善知進退相 隨法而依止

方便示涅槃 佛說善導師 知心心相續

二心不共俱 是名知心性 佛讚能護衆

知諸法性淨 如空水中月 知者離煩惱  
是謂淨衆生 知一餘亦然 入諸法如夢

虛空不可取 得道無染汙

說此分別諸法門時七十二那由他衆生發阿耨多  
羅三藐三菩提心三萬二千菩薩得無生法忍時大  
寶莊嚴堂六種震動大光普照諸天於虛空中作百  
千種伎樂雨種種天華說如是言此諸衆生爲如來  
印所印已入如來法中聞此法門心得信解受持通  
利能爲他說如法修行白佛言世尊我等一切向此  
佛土深心供養恭敬禮拜以如來應供正遍知出世

大方等大集經卷第十三

三

讓三

故聞說此方便法門及見此土菩薩爾時虛空藏菩  
薩聞佛解說已心淨歡喜心淨歡喜已以無價寶網  
供養於佛寶網中放大光明照十方諸佛國土供養  
已白佛言世尊未曾有也如來無礙智如是甚深難  
解如來應供正遍知如所聞法門佛以無礙智如實  
解說一切大衆皆得歡喜

大方等大集經卷第十三

大方等大集經卷十三計字壹萬壹千肆百柒箇

折足制錢拾陸千捌百貳拾壹文

光緒七年十二月常熟刻經處識

常熟劉叔涵刊刻

大方等大集經卷第十四

北涼天竺三藏曇無讖譯

虛空藏菩薩所問品第六之三  
爾時衆中有一菩薩名曰速辯卽從座起偏袒右肩  
右膝著地合掌向佛白佛言世尊此虛空藏菩薩何  
因緣故名虛空藏佛告速辯菩薩善男子譬如大富  
長者多諸民衆無量庫藏財寶充滿能行布施心無  
慳悋若行施時貧窮往者隨意所須開大寶藏悉能  
給與彼諸衆生皆得適意長者施已心喜無悔善男  
子虛空藏菩薩亦復如是常行功德成就方便力回

大方等大集經卷一四

一

藏四

向故戒身善清淨故得成就神足力故純至究竟善  
清淨故所願增益成就故知一切法如幻化故得如  
來神足力故於虛空中隨衆生所須若法施若財施  
盡能施與皆令歡喜以是故善男子是大士證此方  
便智故名虛空藏復次善男子過去無量阿僧祇劫  
復過無量阿僧祇劫不可思議不可稱不可量不可  
算數爾時有佛出世號普光明王如來應供正遍知  
明行足善逝世間解無上士調御丈夫天人師佛世  
尊世界名大雲清淨劫名虛空淨是大雲清淨世界  
豐足熾盛安隱快樂多諸天人地平如掌無諸沙礫

荊棘寶繩界道雜寶莊嚴輒如天衣閣浮檀金華遍  
布其地衆寶間錯世界衆生無上中下人天同等如  
兜率天彼世界無有村營城邑聚落是諸天人各有  
寶樓臺觀人宮在地天處虛空以此爲異是普光明  
王如來壽命十六中劫純以菩薩爲僧有六十那由  
他皆得神通遊戲於菩薩行悉得自在爾時三千大  
千世界處中有一四天下名曰日明如來於中成阿  
耨多羅三藐三菩提於三千大千世界而作佛事彼  
日明四天下中有轉輪聖王名功德莊嚴於四天下  
而得自在七寶成就是大聖王於四天下中起七寶

臺東西八由旬南北四由旬周匝有五百園觀是功  
德莊嚴聖王有三十三萬六千宮人婁女端正姝妙  
如天玉女有四萬童子端正勇健各與半那羅延力  
等爾時功德莊嚴王與童子婁女及諸眷屬俱出詣  
大樂莊嚴園遊觀作樂歌舞以自娛樂爾時衆中有  
二大夫人一名德威二名德光離本坐處詣一樹下  
思惟諸行無常當思惟時各有一子化生膝上端正  
殊妙成就第一微妙之色相好嚴身觀者無厭身放  
大光普照園觀於上空中諸天唱言此二童子一名  
師子二名師子進從是已來常名師子師子進爾時

二子適生不久說諸妙偈讚功德莊嚴王言

昔造善惡不敗亡 供養諸佛亦不失

純至不捨菩提心 堅持所聞不忘智

調伏自守不失戒 忍辱柔和善防護

能報恩者造善業 能勤精進不失道

善能專心定諸根 心能分別思惟慧

以智能造不濁業 以此淨法證菩提

不爲煩惱所染著 善能分別諸義趣

是故能捨受胎形 化生清淨蓮華中

我等從上醫王佛 聞此普光明如來

三ノ等ノ入集經卷二

四

三

讓四

智慧無等叵思議 故來至此爲法故

願共父王到佛所 禮拜供養大法王

諸佛世尊甚難值 亦如優曇波羅華

王聞是語甚適意 時會大眾皆歡喜

百千萬種導從王 俱共發進向佛所

到已瓔珞及雜華 塗香妓樂諸供具

供養圍遶七市已 合掌敬禮在前立

爾時師子師子進 頂禮兩足天人尊

以口鳴足而讚歎 言辭妙巧順法義

世尊是舍依止護 爲世盲冥開大明

體衆心行到彼岸

隨所信樂能悅可

今此大王恃王位

貪著色聲香味法

是故不來至佛所

失供養佛不聞法

快哉世尊生大悲

願說無上菩提法

令此大王發道心

堅固不退於佛智

佛踊八十多羅樹

處在虛空告王言

人王汝今至心聽

聞已如法而奉行

五欲無常喻如夢

命喻草火如霜露

王及國邑如幻化

是故智者不足貪

習行欲者無厭足

習欲更增渴愛心

習猶未足而命終

唯得聖智者乃足

汝當善順觀已身

諸陰如幻不堅固

四大其猶如毒蛇

六情無實如空聚

妻子珍寶及王位

臨命終時無隨者

唯戒及施不放逸

今世後世爲伴侶

觀我神足力無畏

以諸相好莊嚴身

辭應弟子徒衆等

是故王宜發道心

大王卽時聞法已

妻子眷屬皆歡喜

七十六千億衆俱

皆發無上菩提心

皆言我已發道心

誓度一切諸衆生

我等妙行爲衆生

成正覺已度脫之

爾時功德莊嚴王從佛聞說如斯等偈及見神變已復增益堅固菩提之心頂禮佛足而白佛言唯願世尊及菩薩弟子大衆受我八萬四千歲請願以衣服飲食臥具醫藥給侍所須爾時世尊及諸大衆爲憐愍王故卽便受請於是功德莊嚴王知佛受其請已歡喜踊躍頂禮佛足遶已便去時王子師子師子進及三萬王子捨世榮位於佛法中剃除鬚髮出家修道勤行精進樂求善法師子及師子進出家未久得五神通堅固不退彼佛知此二人得神通已加其威

大華嚴經卷一百

五

讓四

神常爲衆生演說妙法彼二比丘卽於彼三千大千世界從國至國從四天下至四天下施作佛事而爲說法彼二比丘以如是因緣化度無量阿僧祇衆生令堅固不退於無上大乘爾時功德莊嚴王於八萬四千歲中以諸樂具供養世尊及大衆已於一切羣臣前後侍從爲聽法故往至佛所而作是念我諸子等剃除鬚髮出家修道常受供養自不行施亦未見得過人之法甯可還家捨財布施修諸功德如我所種諸善根耶爾時普光明王如來卽知功德莊嚴王心所念告師子進菩薩言善男子現汝自在功德神

力菩薩變現使此大衆普得見聞回彼邪心使得正  
見爲降伏諸魔外道故爾時師子進菩薩卽時入定  
已現如是等相使三千大千世界六種震動於上虛  
空中雨種種妙物所謂諸華香末香塗香繒蓋幢旛  
作種種天樂美饍飲食瓔珞衣服種種珍寶皆從空  
中繽紛而下雨如此寶滿足三千大千世界衆生得  
未曾有皆大喜悅爾時從地神諸天上至阿迦膩吒  
天皆歡喜踊躍唱如是言此大菩薩可名虛空藏所  
以者何以從虛空中能雨無量珍寶充足一切故爾  
時世尊卽印可其言名虛空藏於是功德莊嚴王見  
師子進作如是無量神變心淨踊悅得未曾有捨憍  
慢心合掌向佛作如是言希有世尊菩薩功德智慧  
乃能如是自然而雨無量珍寶充足一切終無窮盡  
世尊在家者施所益無幾夫出家者以神通力施無  
涯際在家者施不稱彼意雖施猶慍以爲苦惱出家  
者施能稱彼意亦不慍惜不生苦惱爾時功德莊嚴  
王卽捨王位與子吉意以眞信心剃除鬚髮於佛法  
中出家修道王出家已爲增長善法故常勤精進出  
家未久修得四禪四無量心及五神通時吉意王以  
法治化國無怨者精進不廢供養世尊佛復告速辯

菩薩善男子爾時功德莊嚴王者豈異人乎莫造斯  
觀卽拘留孫如來是也爾時師子菩薩者則我身是  
爾時師子進菩薩者卽虛空藏菩薩是也善男子虛  
空藏菩薩當於爾時初於空中雨無量珍寶以是因  
緣常名虛空藏善男子爾時王子吉意者今彌勒菩  
薩是也爾時三萬王子於彼佛法中出家者今與虛  
空藏菩薩來此衆中聽法者是於彼佛法中先出家  
者彼王內外眷屬及王子所化衆生今現在十方行  
菩薩道是故速辯菩薩應常淨戒聚增長本願以淨  
戒聚增長本願故隨欲所作皆能成辦爾時衆中有  
諸菩薩渴仰欲見虛空藏神變之力虛空藏相貌云  
何爾時世尊知衆心所念卽告虛空藏菩薩言善男  
子現汝神變虛空藏相爾時虛空藏菩薩卽入稱一  
切衆生意三昧入已以此三昧力故於此三千大千  
世界妙寶莊嚴堂上虛空中雨種種妙物隨衆生所  
欲盡給足之所謂須華雨華須鬘須香須末香須塗  
香須繒蓋幢旛須種種音樂須嚴身之具瓔珞衣服  
須餽饍飲食須車乘翼從須金銀瑠璃玻瓈砮磔碼  
齒真珠珊瑚雨如是等種種珍寶隨意與之有須法  
欲法樂法之者於虛空中隨所樂聞出衆法音悅可

耳根所謂修多羅祇夜授記伽陀優陀那尼陀那阿  
波陀那伊帝目多伽闍陀伽毗佛略阿浮陀達磨優  
波提舍須如是等經者盡出應之須那羅等變音者  
須巧言語音者須種種雜音者須甚深音者須方便  
淺音者須如是等音者盡出應之須聲聞乘度者出  
四諦法音應之須緣覺乘度者出甚深十二因緣法  
音應之須大乘度者出六波羅密不退轉法音應之  
又於空中出諸妙偈曰

說諸法性 如虛空等 今說其門 衆咸諦聽

如空無高 亦無有下 以無高下 亦無體性

二才等二集卷第一日

入 讓四

如空無生 亦無有滅 以無生滅 性不敗壞

如空無增 亦無有減 以無增減 同諸法相

如空無明 亦無有闇 以無明闇 心性亦爾

如日照空 亦無有喜 不照不憂 智者學爾

如雨鋒箭 不傷於空 行者修空 亦不可傷

如空水潤 無有喜悅 智者稱利 亦無喜悅

如空毀譽 無有分別 智者毀譽 亦復如是

如動大地 空終不動 智者無依 不動法性

如干火災 不燒虛空 智煩惱者 不爲所燒

如空常住 無有敗壞 諸法亦爾 常住法界

喻如虛空 受一切色 法界亦爾 受一切法

如空非色 相不可見 心性如是 同空無相

虛空假名 無有形貌 心意識然 亦假名說

如空無邊 終不可取 大人智然 與虛空等

如鳥行空 無有足跡 行菩提然 行不可見

身滅過去 如虛空等 現在諸陰 同虛空相

四大亦然 同如虛空 如三災後 無諸異相

一切眾生 不能滿足 凡夫如是 五欲無滿

若有聖智 知一切法 彼足無求 離婬貪著

如空廣大 無有邊涯 佛法亦爾 無有邊際

三才文集卷之一日

九

讓四

知諸法性 是佛法者 彼不依物 亦不捨物

知物非物 住於實際 於物非物 無有二相

以聲明空 空性非聲 無有音聲 是名爲空

佛雖說空 終已無說 空性叵說 是故名空

如幻化夢 野馬影響 諸佛說法 皆悉如是

爲導衆生 說如是喻 真淨之義 更無譬喻

諸法無相 以相而說 相及無相 法性俱無

空相爲相 空亦無相 體此相者 是爲菩薩

無滯無礙 無戲無動 無始無終 是爲菩薩

不離衆生 非衆生數 如衆生性 是爲菩薩

喻如幻師 斂衆幻人 實無死者 所度亦爾  
幻與衆生 泥洹佛法 空知同一性 無性無相  
此大士得 無盡空藏 充足一切 各不可窮盡  
昔植衆德 故獲斯藏 不有貯聚 乃能如是  
能知諸法 因緣生者 其藏無盡 不可思議  
救世大仙 說四無盡 空及道心 衆生佛行  
若財是實 則可貯聚 非實無窮 是以無盡  
究竟空法 已盡無盡 無盡不盡 是謂無盡  
知此門者 近於菩提 住此門故 速成菩提  
以虛空藏 菩薩神力 故於上空 中雨如是 等妙法 及  
財令三千大千世界 一切衆生 得無量不可思議 快  
樂所願 具足有患苦衆生 蒙藥除愈 孤窮衆生 得無  
量珍寶 繫閉衆生 得開悟解 脫諸根不具者 悉得具  
足 應被刑戮者 空中雨諸化人 而代受之 親愛久別  
悉得歡會 被憂箭衆生 悉得無憂 墮三塗衆生 蒙光  
觸身 除一切苦惱 身心快樂 爾時此三千大千世界  
中衆生 各各飲食遊戲 五欲具足 共相娛樂 或有行  
施作諸功德 一切衆生 成就如是等樂 各作是言 乃  
有此大士 能施世樂 此虛空藏菩薩 出世故 能施世  
間甘露 乃能常勤 爲與一切衆生 樂無疲倦也 虛空

藏菩薩現如是等神變悅可一切衆生性示現菩薩神力以財施法施攝衆生故令無量阿僧祇衆生發阿耨多羅三藐三菩提心令無量菩薩得無生法忍復令無量阿僧祇不可說不可說諸菩薩發勤精進故得成就諸三昧門陀羅尼門得遊戲神通門爾時生疑菩薩作是念此不可思議未曾有也虛空藏菩薩但於娑婆世界示現種種神足也亦於他方世界現種種神足耶爾時虛空藏菩薩知生疑菩薩心所念卽放身光以此光明力故普照十方無量無邊諸佛世界爾時生疑菩薩及餘菩薩皆見虛空藏以神

變力於十方無量無邊不可思議諸佛世界應化衆生亦如此娑婆世界等無有異一切聲聞辟支佛所不能爲生疑菩薩見如是神變已疑網卽除合掌禮虛空藏菩薩而作是言希有大士乃能安此無盡之藏在虛空中普雨充足無量世界而猶不盡大士有安此藏在於空中其已久如虛空藏言善男子自我發阿耨多羅三藐三菩提心已來常有此藏在於空中生疑菩薩又問大士發阿耨多羅三藐三菩提心已來幾時虛空藏答言世尊當知汝可問之生疑菩薩卽白佛言世尊虛空藏菩薩發阿耨多羅三藐三

菩提心已來爲經幾時唯願說之除我等疑佛告生  
疑菩薩言善男子此事久遠甚深難知若當說之令  
諸天人皆生疑惑不信佛語以不信故得無量罪生  
疑菩薩復白佛言世尊唯願說之若有久植善根者  
必當信受佛告生疑菩薩言善男子汝已慙懃欲聞  
豈得不說諦聽諦聽善思念之吾當爲汝分別解說  
爲堅固善根久植德本者生喜悅故善男子喻如一  
恒河沙數等諸恒河沙以此諸恒河沙一沙爲一佛  
土末爾所佛土盡爲微塵聚著一處有一長壽之人  
於此塵聚中百劫乃取一塵盡此塵數欲知虛空藏  
菩薩發心已來劫數復過於此非算數所知善男子  
當以此比知虛空藏發心久近善男子乃往過去過  
恒河沙數等諸恒河沙以此諸恒河沙一沙爲一佛  
土末爾所佛土盡爲微塵復過是數百千萬劫爾時  
有佛號曰淨一切願威德勝王如來應供正遍知明  
行足善逝世間解無上士調御丈夫天人師佛世尊  
彼佛世界名曰現無量諸佛刹土劫名衆寶莊嚴彼  
佛世界何故名曰現無量諸佛刹土善男子以彼刹  
土真淨故能現十方諸佛刹土喻如無翳淨月現於  
清水善男子以是因緣故十方無量阿僧祇諸佛刹

土及彼諸佛并師子座衆生所作皆現彼國是故彼  
世界名爲現無量刹土。其分與百億三千大千世  
界等廣博嚴淨豐。安。天人熾盛地平如掌無有  
丘陵埠阜穢惡不淨多諸珍寶間錯而成端嚴可樂  
懸諸繒綵幢旛華蓋莊嚴燒栴檀沉水衆妙雜香以  
雜色劫波育張施其上衆寶妙華以布其地在在處  
處生寶華樹果樹衣樹瓔珞樹伎樂樹寶器樹香樹  
燈樹藥樹等普以莊嚴以界八道平正分明眞珠瓔  
珞寶網莊嚴觀者無厭彼世界中不假日月光明以  
諸燈樹及摩尼樹而以照明無有晝夜唯以寶華開  
合知有時節彼世界中衆生無盲瞎僂蹇短跛蹇  
形體不具顏貌醜惡窻一。睬眼無有如是等醜惡衆  
生一切衆生皆成就三十二相莊嚴其身彼世界中  
乃無三塗八難諸惡名字亦不聞外道異學音聲彼  
世界衆生皆必定於阿耨多羅三藐三菩提亦無聲  
聞辟支非名彼佛純說諸菩薩乘彼世界中無女人  
及胎產者一切衆生結跏趺坐自然化生無老病名  
盡彼壽命命終之後生餘清淨佛土或還生本土善  
男子彼土成就如是無量無邊不可思議功德我若  
一劫若減一劫說彼功德終不能盡善男子爾時現

無量諸佛刹土中有一轉輪聖王名曰寶灌頂典  
領三千大千世界於諸佛所久植德本利根智慧威  
德成就灌頂聖王有三萬六千子皆於蓮華中化生  
已於過去諸佛所久植善根爾時淨一切願威德勝  
王如來與諸天世人大衆恭敬圍遶遊於衆天灌頂  
聖王住處諸菩薩衆無量無數非算師及算師弟子  
所能算知彼佛壽命百千劫劫數長短如此賢劫彼  
世界衆生經爾所劫謂如一劫爾時衆天灌頂聖王  
請淨一切願威德勝王如來及菩薩僧四十中劫劫  
數長短如此中劫供養適意餽饍飲食衣服臥具房

舍臺觀園林浴池如是等種種所須之物而以供養  
爾時衆天灌頂聖王爲供養佛故莊嚴一小千世界  
以爲妙堂純以瑠璃寶莊嚴其地周匝垣牆衆寶合  
成以赤栴檀及優陀羅娑羅栴檀爲柱以磲磔寶爲  
櫺櫺間錯此堂以如是等莊嚴合成甚可愛樂世尊  
中食後從三昧起在此堂中爲諸大衆講說妙法復  
莊嚴一堂與一四天下等欲令如來及菩薩僧於其  
中食日日所用食直珍寶如大山積善男子爾時衆  
天灌頂轉輪聖王於四十中劫常專一念未曾放逸  
不作餘事常以一切樂具供養如來及菩薩僧於爾

所時所作功德亦不發願有所志求過四十中劫於  
最後日以無價三衣供養如來諸菩薩僧各施一衣  
當於爾日世尊中後爲諸大衆廣說妙法於時衆天  
灌頂聖王侍從圍遶爲聽法故往詣佛所爾時世尊  
知彼聖王功德淳淑堪任有用於時世尊及衆天灌  
頂轉輪聖王等七日七夜都無食想處師子座身不  
傾動說大乘經名攝菩薩淨行不退轉輪方便世尊  
說如是法爲欲令盡受持不忘失故灌頂聖王於七  
日七夜心不散從佛聞法歡喜踊躍其心悅豫從  
座而起頂禮佛足右遶七匝遶七匝已右膝著地合  
掌向佛深心淳至發阿耨多羅三藐三菩提心已卽  
說偈言

二六等入集經卷一四

三

讓四

我發無上心 請召諸羣生 無救者作救  
冥世開大明 非爲一法行 非爲供一佛  
非爲一衆生 願度無餘故 生老病死苦  
衆惱所逼者 一切莫憂懼 我誓要當度  
欲瞋癡慢覆 失道造諸惡 正斷邪惡業  
導至無畏城 墮三塗衆生 難處受衆苦  
強志莫憂懼 我生施無畏 無明癡所翳  
不識解脫門 我爲然法炬 得明至涅槃

爲四流所漂 沉溺不得邊 爲造勝法船  
令度諸有流 處生死飢饉 食先白業盡

我爲作導師 當令至安樂

佛告生疑菩薩言善男子爾時灌頂聖王說此偈已  
彼佛世界卽六種震動光明遍照於時聖王發道心  
已卽得菩薩三昧名曰不退菩提心以得此三昧力  
故常得見諸佛無礙乃至夢中一切煩惱不爲作患  
自是已後其心不與嫉妒共俱不與破戒俱不與瞋  
恚俱不與懈怠俱不與散亂俱其心不與愚癡等俱  
彼灌頂聖王盡其形壽常給侍世尊左右爲聞法故

六度集經卷一四

二

讓四

又常教化三萬六千子令發阿耨多羅三藐三菩提  
心亦復教化餘無量無邊衆生令發阿耨多羅三藐  
三菩提心善男子爾時衆天灌頂轉輪聖王者豈異  
人乎莫造斯觀卽今虛空藏菩薩是也爾時彼諸王  
子及諸大衆教令發阿耨多羅三藐三菩提心者今  
此會中大力精進大智慧諸菩薩摩訶薩聽法者是  
善男子虛空藏菩薩發心已來經如是無量阿僧祇  
劫行菩薩道此虛空藏菩薩從發心已來未曾失菩  
提心未曾胎生常值諸佛聽法供養衆僧於諸佛所  
受持正法攝取爲首未曾失念能善分別成就遍行

初發心已得甚深難解菩薩初地能行諸施成就大悲得無戲論無有厭倦發勤精進學一切諸論知一切世法成就慚愧得堅固念力此菩薩住於初地於無量阿僧祇不可稱不可量不可思議不可說不可說阿僧祇劫能淨純至具足行檀波羅密於諸衆生常行大慈勤修攝法一切波羅密及諸助道法成就欲精進不放逸等皆隨順檀波羅密是菩薩住於初地常勤給侍供養諸佛勤求方便教化衆生淨佛國土住於初地得入一切諸地智慧光明而不過初地然後乃成就無量功德智慧資糧得如來力持不退

神通已離諸地障礙而從初地入菩薩第二地住無量阿僧祇劫淨於二地修尸羅波羅密乃至十地爲一一衆生所經劫數亦復如是於一一地中過無量阿僧祇劫成就菩薩行爲諸衆生現作佛事而不捨菩薩所行善男子少有菩薩能行如是甚深不思議殊勝不散亂純至勤修進行如此虛空藏菩薩所行成就者爾時生疑菩薩問虛空藏菩薩言希有善男子乃能如是發弘誓願於此大乘久住生死無疲倦耶虛空藏答言善男子此大地運載諸山河石壁樹木藥林一切藥草百穀苗稼及諸衆生有疲倦不答

言不也大士虛空藏言善男子諸菩薩心亦如大地  
純至成就故行菩薩行無有疲倦亦復如是虛空藏  
復言善男子如此大地住於水上此水持地無有疲  
倦諸菩薩心亦如大水以大悲力故教化衆生無有  
疲倦亦復如是虛空藏復言善男子如此大水住於  
風上此風持水無有疲倦諸菩薩心亦如大風以大  
方便力故淨佛世界無有疲倦亦復如是虛空藏復  
言善男子喻如大風住於空中無所依止此空持風  
無所障礙無有疲倦諸菩薩心亦如虛空以般若波  
羅密力故集一切佛法無有懈廢疲倦亦復如是所

以者何菩薩知一切法相所以成就無生無作者無  
受者因緣合成故而有所作所作諸法亦無有實本  
際空故本際離故實無成就自性空故無生無滅知  
一切諸法性相如是故不見有法可生疲厭及疲厭  
者所以者何菩薩知一切法無二故知生死性與涅  
槃性等知涅槃性與一切法性等知一切法性與無  
性等故亦不恃不著知一切諸法過去際未來際無  
自性以定力故誓願力故不起於定而能現一切所  
作爾時生疑菩薩問虛空藏菩薩言唯願大士說諸  
菩薩三昧行業何謂三昧何謂行三昧業者虛空藏

菩薩答生疑菩薩言善男子有八萬四千種諸三昧  
門此諸三昧門能總攝一切諸餘三昧何等是八萬  
四千三昧門善男子菩薩有三昧名曰不忘菩提心  
能成就不散亂行有三昧名曰降伏能淨純至有三  
昧名曰不顯行能究竟成就不退所作有三昧名曰  
無依能增進成就畢竟有三昧名曰無垢能成就自  
心有三昧名曰照耀能開示善法有三昧名曰真淨  
能過一切魔行有三昧名曰涌出終不爲外道諸論  
之所降伏有三昧名曰捨離能調伏一切諸煩惱結  
有三昧名曰迴伏能令一切入真實道有三昧名曰

轉進能離聲聞辟支佛地有三昧名曰樂遊能不厭  
生死有三昧名曰趣向能從一地至一地故有三昧  
名曰怡液能成就悅可大衆故有三昧名曰無礙光  
能於一切衆生成就等心有三昧名曰知所作能順  
一切所作不逆故有三昧名曰師子相能成就大衆  
無所畏有三昧名曰心勇能降伏四魔有三昧名曰  
蓮華莊嚴能成就不染世法有三昧名曰光莊嚴能  
普照諸佛世界有三昧名曰清涼能斷離憎愛故有  
三昧名曰幢相能成就一切佛法光明故有三昧名  
曰炬王能成就大智慧光明有三昧名曰日光能成

就斷除無明闇冥有三昧名曰集德能成就辯辯無盡有三昧名曰那羅延能成就金剛身有三昧名曰堅固能成就不掉動心有三昧名曰彌樓幢能成就不見頂相有三昧名曰堅自在能成就度本願有三昧名曰金剛土能成就不退諸通有三昧名曰金剛場能成就昇於道場有三昧名曰喻如金剛善能鑑徹一切諸法有三昧名曰行王能觀一切衆生心行有三昧名曰慧王能成就勝智知諸根滿足未滿足者有三昧名曰隨類能成就隨衆生性而爲說法有三昧名曰修一切諸身能成就法身有三昧名曰不眴能得成就無礙見諸如來有三昧名曰無諍能得分別一切因緣有三昧名曰無垢輪能得成就轉妙法輪有三昧名曰電光能得覺諸法因緣有三昧名曰善分別能知諸界盡同一界有三昧名曰莊嚴王能得成就相好有三昧名曰隨解王能以一音報於一切有三昧名曰不分別法界能知一切三昧同一三昧有三昧名曰堅固能得不退於諸法性有三昧名曰不可壞能知諸法同於法性有三昧名曰無終能知本際非際有三昧名曰無作能成就如如無有變易有三昧名曰無動能知諸法平等如虛空有三

昧名曰淨住能得成就諸波羅密有三昧名曰善攝  
能成就四攝法有三昧名曰等行能得成就四梵行  
有三昧名曰無礙觀能得成就諸助道法有三昧名  
曰海印能得總持諸佛所說有三昧名曰空能斷一  
切諸見有三昧名曰無相能斷一切諸覺有三昧名  
曰無願能得淨成就一切諸願有三昧名曰決了能  
得成就無生法忍有三昧名曰不脫能得成就不失  
所聞法有三昧名曰無翳能以善說悅可衆生有三  
昧名曰得豐能得成就寶手有三昧名曰法雲能雨  
一切法門有三昧名曰寶莊嚴能得成就不斷三寶

勝種有三昧名曰無比能成就智所作業有三昧名  
曰虛空門能得離一切障礙有三昧名曰智印能得  
遍知一切諸法有三昧名曰現見諸佛能得成就諸  
如來功德有三昧名曰選擇寂靜如意能得成就離  
於本際有三昧名曰分別一相法門能得成就於未  
來世說一相法門有三昧名曰子知一切法平等性  
能得成就解了一切經書有三昧名曰集諸功德能  
得潤益一切衆生有三昧名曰遊戲神通能得成就  
不思議解脫有三昧名曰自覺能入如來秘密之藏  
有三昧名曰首楞嚴能於菩薩地中乃至示大涅槃

有三味名曰遍至能得成就在在現存有  
三味名曰灌頂王能得成就菩薩所行無餘有三味名曰無勝  
能得成就如來十力有三味名曰無盡能得成就四  
無所畏有三味名曰無等等能得成就佛不共法有  
三味名曰願王能得成就法界聞法自利利他功不  
唐捐有三味名曰善入無垢印能現前覺了一切佛  
法有三味名曰善知覺能得成就薩婆若智無有遺  
餘有三味名曰盡無邊能得成就一切佛事受行無  
餘善男子此謂八萬四千三昧門以此等爲首菩薩  
坐道場時便得八萬四千諸三昧門一一三昧以無  
量阿僧祇曰千萬億三昧以爲眷屬善男子是諸三  
昧能知八萬四千種衆生諸所行法亦能顯現八萬  
四千法聚善男子是爲略說諸菩薩行及諸佛法藏  
少分而諸菩薩行無量無邊諸佛法藏不可思議爾  
時虛空藏菩薩說是法時有萬六千菩薩柔順忍  
無量三昧而現在前復有八萬四千衆生發阿耨多  
羅三藐三菩提心爾時世尊讚虛空藏菩薩言善哉  
善哉善男子快說是諸三昧法門善說如來勝智如  
汝自身證行此法不從他得爾時生疑菩薩合掌向  
虛空藏言希有大士乃能成就如是不可思議功德

不從他聞而能入於如來勝智行處我亦願樂欲令一切衆生得此不思議法如來行處爾時大德舍利弗問生疑菩薩言善男子誰爲汝作生疑名也生疑菩薩答舍利弗言菩提心爲我作此生疑名所以然者若不發菩提心於佛法中終不生疑其有發阿耨多羅三藐三菩提心者其人於一切佛法則生疑惑爲欲現知明了一切佛法故譬如灌頂刹利王最大太子成就王相應作國主次父之後應紹王位是故其子每常諮問治國之法我當云何監領國事大德舍利弗菩薩摩訶薩亦復如是畢竟發阿耨多羅三藐三菩提心者次如來後亦應紹繼無上法王尊位亦常思惟諮問一切智相應之法我等應當云何持無上法王法也是故亦於一切佛法每常生疑大德舍利弗當知以此因緣由菩提心故立此生疑名也生疑菩薩復語舍利弗言大德我從昔來不憶值諸佛菩薩及善知識未曾不問諸佛妙法是故我真名生疑也

大方等大集經卷第十四

大方等大集經卷十四計字玖千陸拾貳箇

折足制錢拾叁千肆百陸拾叁文

光緒七年十二月常熟刻經處識

大方廣大集經卷一四

言

讓四



大清光緒七年十二月常熟刻經處識  
常熟劉叔涵刊刻

大方等大集經卷第十五

虛空藏菩薩所問品第六之四

爾時虛空藏菩薩白佛言世尊諸佛行處不可思議

菩薩所應行法亦復無量是故此行不可以少誓莊

嚴不可以少言說不可以小乘道而得成就快哉世

尊唯願說諸菩薩大誓莊嚴及道莊嚴菩薩以大誓

莊嚴及道莊嚴故能乘大修行眞實最上出世間道

爲當得出世無上大乘成就一切自然大智雖未成

一切智能作佛事利益衆生佛告虛空藏菩薩言善

男子諦聽諦聽善思念之吾當爲汝分別解說諸菩

薩大誓莊嚴乘莊嚴道莊嚴唯然世尊願樂欲聞佛

言善男子菩薩有二十莊嚴法以自莊嚴自莊嚴已

能乘大乘何等爲二十善男子若有菩薩畢竟發阿

耨多羅三藐三菩提心於一切衆生生最勝大悲生

利益衆生心生利益衆生心已便能莊嚴無上大誓

何謂大誓莊嚴爲度未度者大誓莊嚴乘大船舫故

爲解未解者大誓莊嚴脫虛妄顛倒故爲安未安者

大誓莊嚴安止無畏道故爲未得涅槃者令得涅槃

大誓莊嚴捨五陰重擔故爲常勤給足衆生大誓莊

嚴

嚴精進不懈怠故爲不捨無量生死大誓莊嚴不疲  
厭故爲悅可一切諸佛大誓莊嚴現前供養恭敬故  
爲受持一切佛法大誓莊嚴不斷三寶種故爲受持  
一切所聞不忘大誓莊嚴得陀羅尼故爲善說法悅  
可一切衆生大誓莊嚴得辯才故爲集無量功德資  
糧大誓莊嚴成就相好故爲悅可一切善知識大誓  
莊嚴堅固所行故爲遮馳散心大誓莊嚴生諸禪解  
脫三昧故爲在阿練若處捨離身命大誓莊嚴得六  
神通故爲欲大師子吼無所畏懼大誓莊嚴現前得  
無我法故爲欲至一切世界大誓莊嚴欲知一切諸

法如幻如夢如影故爲普照嚴飾一切世界大誓莊  
嚴淨戒衆生受持成就力故爲成就如來十力大誓  
莊嚴滿足諸波羅密故爲得四無所畏大誓莊嚴如  
所說行故爲盡得十八不共法大誓莊嚴如所聞菩  
薩地法不戲論故善男子是爲諸菩薩二十大誓莊  
嚴以此莊嚴力故能乘於大乘菩薩以此自莊嚴力  
故斷三惡趣因緣是名莊嚴具足善爲諸佛所護持  
是名莊嚴隨所欲至便得往生是名莊嚴捨一切胞  
胎能化生諸佛前是名莊嚴能行無諍身口意業是  
名莊嚴住不放棄行爲諸天世人之所恭敬是名莊

嚴善通達三脫門而不證實際是名莊嚴一切無我  
法皆現在前而猶不捨大誓莊嚴是名莊嚴是爲菩  
薩具足大誓莊嚴云何名爲莊嚴菩薩乘善男子乘  
者謂無量也無邊涯故普遍一切喻如虛空廣大容  
受一切衆生故不與聲聞辟支佛共是故名大乘復  
次乘者以正住四攝法爲輪以真淨十善業爲輻以  
淨功德資糧爲轂以堅固淳至畢竟爲鞞鞞釘鑷以  
善成就諸禪解脫三昧爲轆以四無量心爲善調以  
善知識爲御者以知時非時爲發動以無常苦空無  
我之音爲驅策以七覺寶繩爲鞵鞞以淨五根爲索

帶以弘普端直大悲爲旒幢以四正勤爲輞以四念  
處爲安詳以四神足爲速進以勝五力爲鑿障以八  
聖道爲直進於一切衆生無障礙慧明以爲軒以無  
住六波羅密迴向薩婆若以無礙四諦度到彼岸是  
爲大乘此乘諸佛所受聲聞辟支佛所觀一切菩薩  
所乘釋梵護世所應敬禮一切衆生所應供養一切  
智者所應讚歎一切世間所應歸趣一切怨憎不能  
輕毀一切諸魔不能破壞一切外道不能測量一切  
世智不能與競此乘殊勝無能過者一切賢聖之所  
守護此乘隨願能至一切佛界故此乘普照能放纒

網光明故此乘有大名稱能出法門故此乘強志不退還故此乘堅牢不懈緩故此乘正住不傾動故此乘衆事備具能滿一切所願故善男子是名大乘諸大誓莊嚴菩薩乘此乘乘此乘已能從一地至於一地是其莊嚴能捨諸地過患是其莊嚴能捨諸魔業是其莊嚴能化度衆生是其莊嚴能淨佛世界是其莊嚴能現菩薩神變是其莊嚴能度生死大饑饉是其莊嚴能入如來行處是其莊嚴善男子云何菩薩莊嚴道善男子菩薩大誓莊嚴及乘大乘已捨一切邪道捨一切邪道已趣於真實正道到薩婆若何謂

正道耶所謂不捨善法故行於大欲不退菩提道故勤修精進善根不失故行不放逸不動淳至不沒於所作必能究竟仰攀上法求功德資糧無有滿足求智慧資糧終不廢捨是爲菩薩正道復次善男子菩薩道者所謂四禪四無量心四空定五神通三福業三學六應敬六念四攝法四念處四正勤四神足五根五力七覺分八聖道分三解脱門知陰方便知界方便知入方便知四諦方便知因緣方便是名爲道菩薩得成就此道方便皆能隨順入六波羅密道所以然者以菩薩六波羅密道不與一切聲聞辟支佛

共故此道一切諸佛皆所稱歎從諸如來口出成就  
方便菩薩能知一切法實性者能住出世間六波羅  
密聖道云何爲住善男子若有菩薩成就自然慧方  
便而求菩提於此五受陰中爲如實覺故求於菩提  
是菩薩知色無常而行布施知色苦知色無我知色  
鈍知色無智知色如幻知色如水中月知色如夢知  
色如影知色如響知色如旋火輪知色無我知色無  
衆生知色無命知色無人知色無主知色無養知色  
空知色無相知色無願知色無作知色無生知色無  
起知色無出知色無形知色寂靜知色離知色無終  
知色無成知色與虛空等知色如涅槃性而行布施  
菩薩如是行施時以施離故知色亦離以色離故知  
施亦離以色施離故知願亦離以願離故知色施亦  
離以色施願離故知菩提亦離以菩提離故知色施  
願離而知一切法同菩提性善男子是爲菩薩出世  
間檀波羅密受想行亦如是知識無常應行布施知  
識苦知識無我知識鈍知識無智知識如幻知識如  
野馬知識如水中月知識如夢知識如影知識如響  
知識如旋火輪知識無我知識無衆生知識無命知  
識無人知識無主知識無養知識無空知識無相知

識無願知識無作知識無生知識無起知識無出知  
識無形知識寂靜知識離知識無終知識無成知識  
與虛空等知識如涅槃性而行布施菩薩如是行布  
施時以施離故知識亦離以識離故知識亦離以識  
施離故知識亦離以願離故知識施亦離以識施願  
離故知識亦離以菩提離故知識施願亦離而知  
一切法同菩提性善男子是爲菩薩出世間檀波羅  
密復次善男子菩薩知色無常而護於戒乃至知色  
如涅槃性而護於戒知受想行亦如是知識無常而  
護於戒乃至知識如涅槃性而護於戒以戒離故知

識亦離知戒離故乃至於識亦離乃至知一切法同  
菩提性善男子是爲菩薩出世間尸羅波羅密屢提  
波羅密毗梨耶波羅密禪波羅密亦如是知色無常  
而行於慧乃至知色如涅槃性而行於慧知受想行  
無常而行於慧乃至知識如涅槃性而行於慧以慧  
平等故知識平等以識平等故知慧平等以慧識平  
等故知願平等以願平等故知慧識平等知慧識願  
平等故知菩提平等以菩提平等故知慧識願平等  
卽知一切法同菩提性善男子是爲出世間般若波  
羅密是爲菩薩出世間波羅密道悉能攝取一切諸

道當知一切諸道皆入在中何故名之爲出世間耶  
善男子五受陰名爲世間菩薩善分別五陰觀是無  
常乃至如涅槃性已知此道中無有世間及世間法  
知此道是無漏是出世間無所繫著是名出世間善  
男子是名菩薩道復次道者所謂如實求一切諸法  
分別選擇不見一切諸法相續積聚無二無別是故  
名道而此道者無有憎愛無憎愛故名爲平等離思  
惟觀察餘乘故名爲廣大去離諂曲故名爲端直去  
離曲心故名爲無姦斷除諸蓋故名無繫滯去離欲  
瞋恚害覺故名無塵垢不受色聲香味觸故名爲安

樂去離諸魔事故名爲清涼去離煩惱衆賊故名爲  
無畏能到涅槃故名爲出要成就靜定故名清淨水  
慧善解故名爲常明善修慈故名清涼樂不捨大悲  
故名進無厭常行喜故名爲悅豫成就捨故名無過  
失順攝法故名爲大富成就施食波羅密力故得薩  
婆若智辯諸佛善護持故名過四魔行法不捨本願  
故名進無滯礙渡一切煩惱流故名無有上一切世  
間無能降伏故名無對善男子此道成就如是等  
及餘無量功德一切大士乘此道故能往來教化無  
量衆生是爲莊嚴無諸煩惱現入煩惱是其莊嚴觀

於無生而不證實際到空無相無作門而能教化行  
諸見諸相諸願衆生是其莊嚴現入聲聞辟支佛涅槃  
不捨生死是其莊嚴現諸趣受生而不動於法性  
現說一切言教而不動於無言是其莊嚴能現一切  
佛事而不捨菩薩行是其莊嚴善男子是爲菩薩大  
菩莊嚴大乘莊嚴道莊嚴菩薩以大誓莊嚴自莊嚴  
故能乘大乘順出世間聖道未得薩婆若爲衆生故  
能作佛事爾時衆中有一菩薩名曰寶德問虛空藏  
菩薩言善男子汝已修此出世間聖道耶虛空藏答  
言已修寶德言云何修虛空藏答言如得清淨道如  
是修寶德問言云何爲清淨道虛空藏答言善男子  
我淨故道淨寶德問言云何爲我淨虛空藏答言如  
世淨寶德問言云何世淨虛空藏答言善男子色過  
去際淨所以然者以色本際無來故色未來際亦淨  
所以然者以色未來際無去故色現在際亦淨所以  
然者以現在色無住故善男子是爲世淨受想行識  
過去際淨所以然者以識本際無來故識未來際亦  
淨所以然者以識未來際無去故識現在際亦淨所  
以然者以識現在際無住故善男子是爲世淨善男  
子以世中世淨故則我淨以我淨故是名道淨寶德

言善男子如是淨道能何所爲虛空藏答言能作大  
智慧光明以此慧明力故能知一切法過去未來際  
寶德復問言何謂過去未來法際虛空藏答言一切  
法於過去際無生於未來際無滅是名知過去未來  
際寶德復問若見過去未來際者爲何所見虛空藏  
答言見二俱離寶德復問何謂二俱離虛空藏答言  
離斷常者善男子若有見法生及著法者則是斷常  
見所以然者由有生故則有滅有生滅故則有斷常  
之見若不見有法從自性他性生者則見因緣若見  
因緣則見法若見法者則見如來若見如來者則見

如若見如者則不滯於斷亦不執常若不常不斷者  
卽無生無滅寶德復問善男子若無生無滅云何有  
名數虛空藏答言假言說故名之法耳善男子猶如  
有空故有色差別名所謂青黃赤白色紫色玻璃色  
琉璃色麤色細色長色短色方色圓色虛空不爲如  
是等法所染然一切色自性亦空一切諸法亦復如  
是同虛空性但假言說有名數耳所謂善法不善法  
世間法出世間法應作法不應作法有漏法無漏法  
有爲法無爲法而菩薩亦不作一切非福行所作福  
行皆是虛誑非真不堅固是菩薩知一切行非行平

等捨離一切相成就般若波羅密力故迴向菩提而亦不見菩提有增有減不於色中求菩提亦不於受想行識中求菩提菩薩以無求故住於清淨戒聚修無願解脫門滿足一切諸願知生死性同涅槃性雖入究竟涅槃爲斷除衆生虛妄顛倒故行菩薩行亦無行法可行善男子如是菩薩入於涅槃行菩薩行善男子凡有所作皆是生死無有所作是名涅槃菩薩所行是無所作是故菩薩名入涅槃行菩薩行善男子凡有染著巢窟妄想戲論取相是名生死涅槃者無染著巢窟妄想戲論取相是名涅槃菩薩以修

無染著巢窟妄想戲論取相行菩薩行是名菩薩入於涅槃行菩薩行當說此法時有五百菩薩得無生法忍爾時世尊讚虛空藏菩薩言善哉善哉夫士快說法性稱菩薩行真實不異虛空藏白佛言世尊此是如來快也所以者何由世尊慧明故我等得斯辯分世尊喻如日光照闇浮提由日威德力故有眼之者得見色像作諸事業由於如來大智力故照一切衆生及餘世界亦復如是諸法實性不可言說諸言說性與虛空等是故諸法不可得數凡有數法則有數量凡有數量則是有爲凡是有爲則可知可斷可

修凡是可知可斷可修則有得有證若於名數法思  
惟籌量分別不見有法可知可斷可修可證可得故  
卽無有得所以然者以一切法無生故能如是正見  
諸法於諸法中不生愛染以無愛染故則無有著以  
無著故則無近以無近故則無受無取何謂無受無  
取謂色若常若無常無受無取受想行識若常若無  
常無受無取色若苦若樂若有我若無我若淨若不  
淨無受無取受想行識若苦若樂若有我若無我無  
受無取色若空若非空無受無取受想行識若空若  
非空無受無取色若離若非離無受無取受想行識  
若離若非離無受無取菩薩以無受無取故得諸法  
無受三昧住是三昧已諸佛世尊以無上心通授是  
菩薩記是菩薩雖入涅槃見一切衆生究竟同涅槃  
性爲教化衆生故不捨大誓莊嚴及菩薩大悲云何  
菩薩入於涅槃行菩薩行善男子凡有所作名爲生  
死凡無所作名爲涅槃菩薩以正智慧見一切諸行  
離相菩薩以法眼明了見故能說如來智明爾時寶  
德菩薩問虛空藏菩薩言善男子汝何爲自隱已智  
言盡是如來力耶虛空藏答寶德言善男子如來豈  
不說隱善顯惡也善男子我還問汝隨意答我善男

子於汝意云何若無阿那婆達多龍王時阿耨大池  
能出四河使諸衆生得受用不寶德答言不也虛空  
藏言善男子若無如來則無法律菩薩無由得成大  
智之海亦不能利益一切衆生以如來出世故則有  
法律諸菩薩得成大智之海亦能化度一切衆生善  
男子是故當知一切菩薩所得辯說能以利益衆生  
皆是如來神力寶德復問善男子諸如來辯可得轉  
至菩薩心不虛空藏答言不也寶德言云何由如來  
力故得辯說也虛空藏答言善男子喻如巧種果樹  
因緣和合便得果實然樹非即果果不離樹善男子

如來所說法菩薩於此法中善順行故便生大智明  
辯因佛說得亦無有轉寶德言希有善男子因緣生  
法如是甚深難測虛空藏言善男子一切諸法究竟  
無生寶德言善男子諸法謂從因緣生虛空藏言善  
男子生已生耶未生生耶寶德言善男子生已不生  
未生亦不生虛空藏言善男子是故無生寶德言善  
男子緣中有因耶虛空藏答言無也寶德言因中有  
緣耶虛空藏答言無也寶德言於汝意云何若因若  
緣自實有性耶虛空藏答言無也寶德言善男子於  
汝意云何諸法無因緣生耶虛空藏答言不也善男

子是故一切法無自性無生無起無出是以緣不生  
因因不生緣自性不生自性他性亦不生他性自性  
不生他性他性不生自性是故說一切法自性無生  
所以者何以如無生無滅法性實際亦無生無滅如  
如法性實際如來所覺一切諸法亦復如是無生無  
滅寶德言善男子如來亦不出世耶虛空藏答言此  
不應說所以者何如來於一切法盡不可說不言出  
不得言不出若有人問言如來出世耶不出世耶智  
者爲不謗如來故應置不答寶德問言云何應置虛  
空藏言如法性住應如是置寶德言云何法性住虛  
空藏答言如虛空性住無所住法性亦如是住如  
法性衆生性亦爾如衆生性一切法亦爾如一切法  
如來亦如是住住無所住無住處故無住無不住是  
故不得言生不得言滅寶德言善男子如來出世事  
甚深甚深虛空藏答言善男子若能如實解了緣生  
法者名爲佛出世寶德言善男子誰當解此說耶虛  
空藏答言若於一切法中不得增減者寶德問言何  
謂爲增虛空藏答言增者所謂增上句謂於無中妄  
生增上無增上句者是平等句無等句無文字句無  
句無教句無教之中無句無增上亦無心意識以是

故非句喻如空中鳥跡究竟已無當無而言鳥跡於一切法中無有字句亦復如是無句而假名爲句如無跡假名爲跡如來出世亦無有出假名爲出亦復如是是故智者不應取著以無取著故假名爲出而常依無出所以者何以無生是一切諸法實性故無生者則無所有是故名一切法無所有爲性無所有性無有住處無住處故是無住際一切諸法及無住際卽是實際實際卽是一切法際是故言一切法與實際等言實際者是三場分斷際不可壞際不斷非常際如實際三世等際以如是等際等一切法際所以者何實際及我際無二無別實際及衆生壽命養育人際無二無別實際及我見際無二無別於我見中無有實際能如是如實知者則無有二十種我見所以者何以實際中無一無多故實際與平等無來無去無盡無滅實際究竟空故是故言一切法無盡門無盡際涅槃者無盡所謂空故無性故如涅槃無盡無不盡一切法亦復如是以是故言一切法與涅槃等諸法無等無不等無儔匹故喻如虛空無有儔匹一切諸法亦復如是若見有儔匹言有涅槃者已言有涅槃便求涅槃則與賢聖相違已言有涅

槃故便言此應知此應斷此應證此應修此應生此  
應滅如是行不具者不能如實知不能如實見則不  
識不解不知不見不識不解一切法故則著於文字  
於諸法中妄生諍競生諍競者於佛法中則爲可愍  
所以然者如來說言沙門之法不應諍競爾時大德  
阿難白佛言希有世尊此大士才辯乃能如是甚深  
明了難解難測也於一切法不從他受如身自證能  
如是說虛空藏菩薩卽謂阿難言大德我已自身證  
知是故如所證知能如是說何以故我身卽是虛空  
以虛空證知一切法爲虛空卽所印大德阿難凡諸

菩薩修身善解身相者能以此身作諸佛事現種種  
色像而亦不退於眞法身亦復不離結業生身又復  
不過於平等法性變現化身悉得自在於一切佛國  
普能示現終已不隱應化之身如是行者皆可名之  
爲身證行阿難問言善男子汝於法頗有證耶虛空  
藏答言大德阿難我不見法離於身身離於法阿難  
言善男子汝若身證者汝得阿羅漢果耶虛空藏言  
大德無得不得無所得故於一切法無惱行故離貪  
欲瞋恚愚癡故是謂阿羅漢阿難言善男子汝何時  
當般涅槃耶虛空藏言大德阿羅漢者無般涅槃知

一切法究竟是涅槃亦無涅槃想凡愚之人有如是分別戲論行言此是生死此是涅槃阿羅漢者無是戲論也大德阿難言善男子如我解汝所說義夫菩薩者不應言是凡夫亦不應言是學不應言是無學去離二相故虛空藏言大德阿難善哉善哉以非凡夫非學非無學故在在處處皆能示現於一切處亦不取著爾時五百大聲聞各以己身所著鬱多羅僧奉上虛空藏奉上衣已一時同聲說如是言其有衆生深心發阿耨多羅三藐三菩提者快得善利於如是大智法藏中不墮其外所上之衣卽便不現彼諸

聲聞問虛空藏言衣何所至也虛空藏答言入我藏中又言如來知之汝等可問爾時諸聲聞卽白佛言世尊衣何所至也佛告諸比丘東方去此過無量阿僧祇諸佛刹土有世界名曰袈裟幢其界有佛號曰山王如來虛空藏已遣此衣至彼世界諸聲聞卽白佛言世尊以何因緣遣衣至彼耶佛言欲以此衣於彼世界施作佛事虛空藏菩薩於此所說如虛空等三昧卽法門此三昧於彼衣中當演其法音彼世界無量阿僧祇諸菩薩聞此法故當得無生法忍諸比丘當知菩薩作如是種種方便利益衆生說此法時

於上虛空中雨無量金色花以此諸花遍覆妙寶莊嚴堂於諸花中出如是法音其有衆生信此虛空藏所說法善順思惟分別其義者皆當爲不退轉印所印畢定得至無上道場爾時阿難白佛言世尊是何瑞應乃雨此花出如是妙音安慰衆生佛告阿難有梵天名曰光明莊嚴從梵天上與六十八百千梵衆俱欲來詣此如來說此語已時諸梵衆忽然來至妙寶莊嚴堂上頂禮佛足右遶七匝遶七匝已在一面立合掌向佛而白佛言希有世尊虛空藏菩薩不可思議戒聚清淨修諸定善分別大智慧能遊戲諸大神通善能滿足大弘誓願善能成就大權方便善能莊嚴身口及意善能於諸法中成就大自在力是虛空藏菩薩身口及意都無所作無有分別憶想而能現此不可思議莊嚴神變又能顯現無量百千法門亦能出入百千諸三昧門從昔已來常樂修習成就諸善法故世尊諸菩薩不應於往昔所修善根不知其因集諸善根亦應無厭所以者何是因往昔所種善根果報故能現如是不可思議神變佛告梵天如是如是如汝所言諸菩薩已成就善根資糧及出要智方便故能現如是不可思議功德莊嚴之事無

憶想分別亦無不分別梵天白佛言世尊云何菩薩  
集善根資糧及出要智方便佛告光明莊嚴梵天言  
善根有三種何等爲三所謂無貪善根無恚善根無  
癡善根是名善根資糧者所謂捨一切所有修慈觀  
諸法是名資糧方便者所謂去離凡夫地不願樂聲  
聞辟支佛地進入諸菩薩地是名方便智者所謂知  
捨不善法智知集善法智知迴向菩提智是名智菩  
薩能住如是等正行者是名出要復次善根者能發  
阿耨多羅三藐三菩提心資糧者所謂求一切善法  
方便者所謂已作未作善根終不廢忘智者所謂知  
心如幻化如是等法現前了知是名出要復次善根  
者所謂淳至資糧者所謂發動方便者所謂深心智  
者所謂無持無動無能行如是等法者是名出要復  
次善根者所謂欲善法資糧者所謂勝進方便者所  
謂安住不放逸智者所謂捨一切依若能行如是等  
行者是名出要復次善根者所謂正信資糧者所謂  
不捨本願方便者所謂不捨念定智者所謂慧能正  
住如是等行者是名成就善根資糧智方便出要復  
次善根者所謂悅可諸善知識資糧者所謂給侍所  
須恭敬供養尊重利益方便者所謂於善知識生世

尊想智者所謂知時非時而問法能正住如是等行者是名出要復次善根者所謂善順聽法資糧者所謂受持不廢忘方便者所謂隨聞能觀智者所謂隨所聞而行能正住如是等行者是名出要復次善根者所謂值佛悅可資糧者所謂護一切諸波羅密諸攝法及助道法方便者所謂能從一地至於一地智者所謂得無生法忍菩薩能正住如是等行者是名成就善根資糧方便智出要爾時光明莊嚴梵天白佛言希有世尊如來能以四句義總說一切菩薩行世尊一切佛法應於中求爾時虛空藏菩薩語梵天言一句亦能總攝一切佛法何謂爲一所謂離欲句所以然者以一切佛法同於離欲如佛法一切法亦然梵天是爲一句總攝一切佛法復次梵天一空句總攝一切佛法一切佛法同於空故如佛法一切法亦然梵天是爲一句總攝一切佛法所謂無相句無願句無作句無生句無起句如句法性句實際句離句滅句盡句涅槃句總攝一切佛法以一切佛法同於涅槃故如佛法一切法亦然梵天是爲一句總攝一切佛法所以者何以如是等句皆非句故一切佛法非句假名爲句復次梵天欲是離欲句所以者何

離欲性卽是欲故一切佛法亦同是性瞋恚是離瞋  
恚句所以者何離瞋恚性卽是瞋恚故愚癡是離愚  
癡句所以者何離愚癡性卽是愚癡故一切佛性亦  
同是性身見是實際句所以者何實際性卽是身見  
一切佛法亦同是性無明是明句所以者何明性卽  
是無明故一切佛法亦同是性乃至苦惱是離苦惱  
句所以者何離苦惱性卽是苦惱故一切佛法亦同  
是性色是虛空句所以者何虛空性卽是色故一切  
佛法亦同是性受想行識是無作句所以者何無作  
性卽是識故一切佛法亦同是性地大是虛空句所

以者何虛空卽是地大故一切佛法亦同是性水大  
火大風大是法界句所以者何法界性卽是風故一  
切佛法亦同是性眼是涅槃句所以者何涅槃性卽  
是眼故一切佛法亦同是性耳鼻舌身意是涅槃句  
所以者何涅槃性卽是意故一切佛法亦同是性梵  
天是爲一句總攝一切佛法菩薩入如是等一一智  
門皆見一切佛法入於一句梵天喻如大海能吞衆  
流一一句中攝一切佛法亦復如是喻如虛空悉能  
包容一切色像一一句中攝一切佛法亦復如是如  
是等一切佛法若攝若不攝若說若不說不增不減

究竟離相故梵天喻如算師數數以算壽布在算局  
上然局中無籌籌中無局所以者何究竟不相應故  
究竟離故如是於上一句中假名數故言一切佛  
法皆入一句而諸佛法不可名數算計究竟不相應  
故究竟離故梵天如佛法名數卽是一切法名數何  
以故一切法卽是佛法此法非法非非法自性空故  
自性離故自性究竟無性故無性卽是虛空虛空性  
同一切法性此法性非生相非滅相非有處相非無  
處相是故一切法名無相無非相說如是一法門時  
於彼梵衆中有萬二千梵天皆發阿耨多羅三藐三  
菩提心復有昔植德本五千梵天得無生法忍爾時  
衆中有一菩薩名曰寶手問虛空藏菩薩言希有善  
男子一切諸法及如來法甚深難測不可思議又善  
男子何謂安一切佛法根本耶虛空藏菩薩答寶手  
言善男子菩提心是安一切佛法根本一切法住菩  
提心故便得增長寶手菩薩言善男子菩提心者何  
法所攝得不忘失能速至不退轉地虛空藏言善男  
子菩提心爲二法所攝得不忘失速至不退轉地何  
等爲二所謂淳至畢竟是名爲二法所攝得不忘失  
能速至不退轉地寶手言善男子此二者爲幾法所

攝虛空藏言此二法爲四法所攝何等爲四所謂淳至者爲不虛詐不諂曲所攝畢竟者爲無我及上進所攝是爲二法爲四法所攝寶手言善男子此四法爲幾法所攝虛空藏言善男子此四法爲八法所攝何等八所謂不虛詐者爲不猶豫及體真淨所攝不諂曲者爲正直及正住所攝無我者爲不退沒及進所攝上進者爲功德資糧及智資糧所攝是爲四法爲八法所攝寶手言善男子此八法復爲幾法所攝虛空藏言善男子此八法復爲十六法所攝何等十六所謂不猶豫者爲大慈及大悲所攝體真淨者爲身調及心調所攝正直者爲忍辱及柔和所攝正住者爲無憍慢及無滯礙所攝不退沒者爲堅固及力所攝上進者爲如所作及正行所攝功德資糧者爲始發及究竟不捨所攝智資糧者爲求多聞及思惟所聞所攝是爲八法爲十六法所攝寶手言善男子此十六法復爲幾法所攝虛空藏言善男子是十六法爲三十二法所攝何等三十二所謂大慈者爲無礙心及於一切衆生等心所攝大悲者爲無厭倦及勤給足一切衆生所攝身調者爲不觸嬾及不加害所攝心調者爲定及寂靜所攝忍辱者爲受正教及

順行所攝柔和者爲慚及愧所攝無憍慢者爲謙卑  
及禮敬所攝無滯礙者爲無垢穢及不强良所攝堅  
固者爲不犯所行及成就本願所攝力者爲住正意  
及不掉動所攝如所作者爲如說能行所攝正行者  
爲正發及正進所攝始發者爲必勝及不退所攝不  
捨者爲樂勝及上求所攝求多聞者爲親近善知識  
及悅可善知識所攝思惟所聞者爲智慧及善觀所  
攝善男子是爲十六法爲三十二法所攝寶手言善  
男子此三十二法復爲幾法所攝虛空藏答言善男  
子是三十二法爲六十四法所攝何等六十四法所  
謂無礙心者爲護我及護彼所攝於一切衆生等心  
者爲無別異及一味所攝無厭倦者爲如夢觀及知  
生死如幻所攝勤給足一切衆生者爲諸神通及方  
便所攝不觸嫉者爲羞恥及信有業報所攝不加害  
者爲少欲及知足所攝定者爲無發惱及無散失所  
攝寂靜者爲捨吾我及離我所所攝受正教者爲求  
法及欲法所攝順行者爲敬重及平等無疲倦所攝  
慚者爲內心斷除及外不行所攝愧者爲信樂佛智  
及在屏處不行惡所攝謙卑者爲不傲慢及知自下  
所攝禮敬者爲身端心直所攝無垢穢者爲具靜定

及修智慧所攝不强良者爲不麤獷及不兩舌所攝  
不犯所行者爲不捨菩提心及念道場所攝成就本  
願者爲捨魔事及佛神力持所攝正住意者爲不輕  
躁及不掉亂所攝不掉動者爲如石山及不可移轉  
所攝如說者爲所作善業及無熱惱所攝能行者爲  
無虛誑及不捨歸趣所攝正發者爲離邊見及順觀  
甚深因緣所攝正進者爲善巧及方便所攝於必勝  
者爲不懈怠及勇猛所攝不退者爲大欲及增進所  
攝樂勝者爲見如來及聞法所攝上求者爲捨諸地  
過患及得諸地功德所攝親近善知識者爲無憎嫉

及信樂所攝悅可善知識者爲敬順及不逆教敕所  
攝智慧者爲無常觀及無我觀所攝善觀者爲修無  
相及不怙涅槃所攝善男子是三十二法爲六十四  
法所攝寶手復問此六十四法復爲幾法所攝虛空  
藏答言善男子此六十四法爲百二十八法所攝何  
等爲百二十八法所謂護我者爲斷一切惡及成就  
一切善根所攝護彼者爲忍辱及柔和所攝無別異  
者爲猶如水心及如風心所攝一味者爲法界觀及  
如如觀所攝如夢觀者爲無移轉觀及無真實觀所  
攝如幻者爲適性示現及無自性觀所攝諸神通者

爲了義及了智所攝方便者爲大悲及般若波羅密  
所攝羞恥者爲不覆藏所犯及悔過所攝信有業報  
者爲不放逸及畏惡趣所攝少欲者爲淨處有齊眼  
及離宿穢所攝知足者爲易稱及易養所攝無發惱  
者爲究竟及究竟邊際所攝無散失者爲得忍及不  
退轉地所攝捨吾我者爲不計我身及與壽命所攝  
離我所者爲無貪及無愚癡所攝求法者爲智及斷  
所攝欲法者爲不著五欲及離煩惱所攝敬重者爲  
起世尊想及療救想所攝無疲倦者爲身輕及翹勤  
省眠所攝內心斷除者爲身念處及受念處所攝外

不行者爲心念處及法念處所攝信樂佛智者爲深  
敬重及淨信所攝在屏處不行惡者爲自證知及諸  
神天證知所攝不傲慢者爲不自歎譽不譏彼人所  
攝知自下者爲不虛稱及不顯己德所攝身端者爲  
不行三不善業及不犯禁戒所攝心直者爲常省已  
過及不說彼短所攝具靜定者爲寂靜心及滅煩惱  
所攝修智慧者爲選擇諸法及知無我所攝不麤獷  
者爲常行益事及順忍所攝不兩舌者爲自足眷屬  
及和合別離者所攝不捨菩提心者爲衆生及爲佛  
智所攝念道場者爲欲壞於魔衆及成正覺所攝捨

魔事者爲正覺及不捨菩提志所攝佛神力持者爲堅固行及善淳至所攝不輕躁者爲堅護諸根及不捨境界所攝不掉亂者爲觀苦及觀空所攝如石山者爲不高及不下所攝不可移轉者爲斷愛及除恚所攝所作善業者爲智所作業及捨魔事所攝無熱惱者爲淨戒及淨定所攝無虛誑者爲誠實語及不望果報所攝不捨歸趣者爲成就賢士業及不行怯弱所攝離邊見者爲觀無生及不敗壞觀所攝順觀甚深因緣者爲觀因及觀緣所攝善巧者爲第一無諍競及不傲慢所攝方便者爲離方便及無生方便所攝不懈慢者爲身力及心力所攝勇猛者爲勝進心及害怨敵所攝大欲者爲不求利養及不愛身命所攝增進者爲無愚冥及不退還所攝見如來者爲修念佛及清淨信所攝聞法者爲樂至講所及樂請問所攝捨諸地過患者爲不散亂行及捨離惡知識所攝得諸地功德者爲方便迴向及不捨本行所攝無憎嫉者爲能施一切及稱意而捨所攝信樂者爲無垢行及不濁心所攝敬順者爲知世宜及隨順行所攝不逆教救者爲捨除不淨及淨正行所攝無常觀者爲動轉觀及敗壞觀所攝無我觀者爲不得作

者及不得受者所攝修無相者爲不緣境界及除覺  
所攝不怙涅槃者爲除去無明及斷愛著所攝善男  
子是爲六十四法爲百二十八法所攝爾時寶手菩  
薩從虛空藏菩薩聞分別如是等法門已歡喜踊躍  
得未曾有卽白虛空藏菩薩言希有大士汝乃能成  
就如斯捷疾辯才及巧分別辯事事所問盡能開解  
如我今者解汝所說義趣及與文字以如是方便若  
一劫若減一劫說不可盡辯亦無斷爾時佛告寶手  
菩薩言善男子如是如是如汝所言此虛空藏菩薩  
若演一句之義若一劫若減一劫說不可盡辯亦無  
斷虛空藏菩薩有如是無量無邊不可思議無量辯  
才爾時寶手菩薩以手遍覆妙寶莊嚴堂於其手中  
出無量花香瓔珞末香塗香衣服嚴身之具及諸幢  
幡妙蓋雨如是等上妙供具供養如來及虛空藏於  
上空千百千音樂不鼓自鳴於諸音中出諸妙偈以  
讚如來

持德開德具百福

上意調伏念不動

沙門大士降天人

十力佛子十方現

大稱威德自在尊

降伏有畏除癡闇

能度漂流諸天人

閉惡趣門使清涼

聖尊巧說音微妙 無錯無謬音清淨

三界無等無三垢 十力所說施眾樂

意念堅固樂靜寂 最勝十力降彼力

已捨諂曲得甘露 無有塵累眾歸仰

世尊處眾不動轉 而化十方無量眾

隨眾修行能隨順 佛子亦樂修此行

如日無翳能普照 能令眾花得開敷

佛智慧光照長流 諸子得悟亦如是

如風無礙山不動 淨如虛空照如日

佛子放光雨甘露 是故我禮佛及子

大方等大集經卷一五

讓五

大千海水尚可量 十方虛空猶可步

諸眾生心尚可同 世尊功德不可盡

大方等大集經卷第十五

音釋

卷第十三 覺 瞞 沮 也 咀 毀 獷 曠 惡 也

卷第二十七 紙 從 十六 行 為 字

卷第十四 礫 力 小 繒 也 增 帛 也 餽 肴 饌 也 鉞 矛 同 勾 也 埠 阜 也

上 步 又 推 同 下 浮 也 蹇 碧 足 不 也 短 也 蹇 堅 上 聲 也

上 聲 土 山 日 阜 也 窳 賚 目 童 櫨 榘 下 博 柱 也 積 怒 聚 也

第八 紙 九 行 南 藏 知 作



